

四庫全書

子部

欽定四庫全書

子部  
玉海卷一百八十五

詳校官中書臣張經田

主事臣祁韻士覆勘

總校官進士臣朱鈴

校對官主事臣陳文樞

謄錄監生臣浦煊

欽定四庫全書

玉海卷一百八十五

宋 王應麟 撰

食貨

會計

禹會計

史記禹會諸侯江南計功命曰會稽會計也 張衡傳

注吳越春秋曰禹登茅山大會計理國之道更名其山

曰會稽

周司會 歲會 月要 日成 土會法

禮天官司會中大夫二人下大夫四人上士八人中士

十六人

注計官之長  
若今尚書

掌典法則書契版圖之貳聽其會

計以參互攷日成

謂司書之要貳與職  
內之入職歲之出

以月要攷月成

以歲會攷歲成 司書上士二人中士四人凡上之用

財用必攷于司會三歲大計羣吏之治事成則入要貳

職歲掌賦出以待會計而攷之以式法贊逆會

注助  
司會

鈎攷羣吏之計

職幣以式法贊會事 太宰歲終令百官各

正其治受其會 小宰六叙五日以叙受其會八

成八日聽出入以要會月終受羣吏之要

主每月之小計

贊冢宰受歲會歲終令羣吏致事

齋歲盡文書若今上計

宰夫八職一曰正掌官法以治要

若歲計也

二曰師掌

官成以治凡

若月計也

三曰司掌官法以治日

若今日計也

歲終

令羣吏正歲會月終正月要旬終正日成 官正月終

會稍食歲終會行事 膳夫外府司裘庖人掌皮典絲

典臬歲終則會 大府歲終會貨賄入出 酒正日入

其成月入其要小宰聽之歲終則會 內宰歲終則會

稍食會內宮之財用 天官言歲終則會者凡十一唯王及后世子之膳禽王及后之飲酒

服王之裘與皮事不會 王制司會以歲之成質于天子冢宰齊戒受質 大司徒以土會

之法辨五地物生 以土計貢 稅之法 小司徒歲終攷屬官之

治成而誅賞 治事 之計 令羣吏正要會而致事 鄉大夫歲

終令六鄉之吏會政致事 州長黨正族師遂大夫鄙

師歲終會政 縣正既役則稽功會事而誅賞 泉府

歲終會其出入而納其餘 舍人歲終會計其政 巾

車歲終則會車之出入 占人歲終則計其占之中否

大司馬受其要 大司寇盟書司會受其貳藏之

小司寇命其屬入會 司民民數司會貳之 士師歲

終則令正要會

司馬於要則受之  
士師於要則任之

管子曰歲一言者君也時省者相也月稽者官也

易氏曰冢宰天官之長也歲終受歲會而無月要之文

小宰天官之貳也月終受月要而無日成之文宰夫天

官之攷也旬終正日成而無參互之文三官各舉其一而司會乃攷其全會之欲其詳也歲會以統月要月要以統日成日有成日攷之也宰夫受之月有要月攷之也宰夫令之而小宰受之歲有會歲攷之也小宰贊之而大宰受之考績設官其序如此尊者總其綱卑者舉其目

周九式 式法 太府式法

禮太宰以九式均節財用祭祀賓客喪荒羞服工事幣



帛芻秣匪頒好用注式謂用財之節度 小宰執九式之貳以均財節邦用 司會以九式之法均節財用

司書掌九職九正九事以周知入出百物叙其財受其幣注九事謂九式鈎考財幣所給及其餘見為之簿書疏九式言用財九事所為之事其理一也 宰夫以式

法掌祭祀之戒具薦羞 酒正以式法授酒材以酒式

誅賞 大府凡頒財以式法授之

注此九賦之財給九式者

凡式貢

之餘財以共玩好之用注謂先給九式及弔用足府庫

而有餘財乃可以共玩好 職幣以式法斂幣 職歲  
以式法出財 掌皮以式法頒皮革 委人以式法共  
祭祀之薪蒸木材注故事之多少也 廩人掌九穀之  
數以待國之匪頒 調賜稍食注調賜謂王所賜予給好  
用之式 舍人以法掌其出入歲終會計其政 典婦  
功常婦式之法注法其用財舊數

周計簿

禮大司徒歲終則令教官正治而致事注上其計簿

士師歲終則令正要會注定計簿 小司徒大比則受  
邦國之比要注要謂其簿 天府治中注謂其簿書之

要

天官司書受其幣職  
內執其總皆簿書也

小宰八成聽師田以簡稽聽

出入以要會注稽猶計也計其士之卒伍閱其兵器為  
之要簿要會謂計最之簿書月計曰要歲計曰會疏云  
計吏其使人計簿其文書也 魯語收攬而烝納要也  
注因祭社以納五穀之要

### 周役要

地官鄉師以國比之法時稽其夫家之衆寡辨其可任  
與施舍者大役則帥民徒而至治其政令既役則受州  
里之役要以攷司空之辟以逆其役事注役要所遣民  
徒之數辟功則章程 小司徒凡起徒役毋過家一人  
以其餘為羨唯田與追胥竭作 大宰八則八曰田役  
以馭其衆 小宰六聯五曰田役之聯事八成一曰聽  
政役以比居注鄭司農云比居謂伍籍比地為伍因內  
政寄軍令以伍籍發軍起數 職方氏辨數要 司徒

正要會 司書及事成則入要貳 大司馬大役與慮

事

蒞城邑也

屬其植受其要

司農云要者簿書也

士師歲終令正要

會 左傳昭三十二年士彌牟營成周屬役賦文書以授帥

周比灋 比要 大比 九比

禮小宰八成一曰聽政役以比居

注伍籍也

宮正比宮中

之官府次舍 小司徒稽國中四郊都鄙之夫家九比

之數

謂九比者冢宰職出九賦之人數

乃頒比法於六鄉之大夫使各

登其衆寡六畜車輦辨其物以歲時入其數三年則大

比大比則受邦國之比要

注大比謂簡閱民數及財物也鄭司農云五家為比故以

比為名今時八月案比是也要謂其簿

乃會萬民卒伍而用之

鄉師以

國比之法時稽夫家衆寡受州里之役要正歲稽其鄉器若國大比則攷教察辭稽器展事以詔誅賞 鄉大

夫三年則大比攷德行道藝興賢能 州長三年大比

大攷州里贊鄉大夫廢興 黨正以歲時涖校比

注如今小

案比頭比舉漢法小案比對三年大比為小

族師以邦比之法帥四閭之

吏以時屬民校登夫家衆寡 閭胥既比則讀法 縣

師大比則攷羣吏 均人大比則均力政 遂大夫大

比則帥吏興厖 縣正掌比以頒田里 鄧長比衆寡

以治祭祀之事 里宰比其邑以治稼穡 秋官司民

大比以民數詔司寇司寇及孟冬獻于王 小司寇大

比登民數自生齒以上登天府 王制冢宰制國用必

於歲之杪注制國用如  
今度支經用以三十年之通制國用量入以

為出 後漢紀安帝元初四年詔方今案比之時注八

月案比案戶口次比之 禮儀志仲秋之月縣道皆案

戶比民 江革傳每至歲時縣當案比注案驗以比之  
猶今兒閱 後漢書論漢法常因八月筭民 急就篇  
潁川臨淮集課錄注諸郡各上其計總會京師次其名  
錄

漢甘泉明堂受計 計相 計簿

帝紀武帝元光五年八月詔吏民有明世務習聖術者

令與計偕

師古注計者上計簿使也  
郡國每歲遣詣京師上之

元封五年三月至

泰山甲子祠高祖明堂因朝諸侯王列侯受郡國計太



初元年祠后土春還受計于甘泉

注受郡國所上計簿若今之諸州計帳

天漢三年三月幸泰山祀明堂因受計太始四年三月

幸泰山壬午祀明堂因受計

武帝一受計于帝都三受計于方嶽

宣帝

黃龍元年二月詔曰方今天下少事而民多貧盜賊不

止其咎安在上計簿具文而已御史察計簿疑非實者

按之列傳張蒼高祖六年為計相後更以列侯主計

蒼自秦時為柱下御史明習天下圖書計籍令以列侯

居相府領主郡國上計者石慶元封四年上報曰間

者河水滔陸惟吏多私征求無已故為流民法以禁重  
賦今流民愈多計文不改 司馬談為太史公注如淳  
曰漢儀注天下計書先上太史公副上丞相云 嚴助  
為會稽太守上書願奉三年計最注如淳曰舊法當使  
丞奉歲計今助自欲入奉之晉灼曰最凡要也 朱買

臣隨上計吏詣闕上書注郡國丞長吏與計吏俱送計  
也 貢禹言武帝時郡國擇便巧史書習於計簿能欺

上府者以為若職 匡衡封僮之安樂鄉

屬臨淮郡

建始元

年郡乃定國界上計簿更定圖言丞相府集曹掾陸賜

以為舉計令郡實之

師古注舉發上計之簿

司隸校尉駿奏衡位

三公輔國政領計簿知郡實正國界計簿已定而背法制專地以自益賜猥舉郡計亂減縣界附益大臣文

翁為蜀守選小吏遣受業博士省少府用度買刀布蜀

物齋計吏以遺博士

循吏

王成為膠東相卒官後詔使

丞相御史同郡國上計長吏守丞以政令得失或對言

前膠東相成偽自增加以蒙顯賞黃霸為丞相張敞

奏霸曰丞相請與中二千石博士雜問郡國上計長吏  
守丞為民興利除害成大化條其對有耕者讓畔男女  
異路道不拾遺及舉孝子正婦者臣恐各為私教澆淳  
散樸有名亡實宜令貴臣明飭長吏守丞天子使侍中  
臨飭上計吏如敞指意 後光武紀建武十四年夏四

月越雋人任貴自稱太守遣使奉計

注若今計帳云長貴遣使上三

傳

年計 張堪傳光武召見諸郡計吏問風土及前後守令

能否蜀郡計掾樊顯進曰張堪昔在蜀仁以惠下云云

拜顯魚復長

周禮疏漢時八月案比而造籍書周以三年大比未知  
定用何月

漢上計律

周禮典路鄭注云漢朝上計律陳屬車於庭

疏云漢朝集使上計

會之法小宰歲終令羣吏致事注云若今上計也 衛宏

漢舊儀朝會上計律常以正月旦受羣臣朝賀天下郡

國奉計最貢獻

歲終遣吏上計正月旦天子幸德陽殿臨軒受賀而計吏皆在列

表

元狩二年上谷太守郝賢坐計謾免

師古曰計簿欺謾

說苑

晏子治東阿三年明上計

新序魏文侯東陽上計錢

布十倍

左傳臧會為賈正計於季氏

注逸計簿

齊五

官之計

秦昭王拜王稽河東守三歲不上計

漢郡守上計蓋

秦制也

漢郡國上計

又見前

後百官志大鴻臚郡國上計屬焉刺史初歲盡詣京都奏事中興但因計吏郡國常以春行縣勸民農桑振救

乏絕秋冬遣無害吏案訊諸囚平其罪法論課殿最歲

盡遣吏上計

注盧植禮注曰計斷九月因秦以十月為正故

令長秋冬集課上

計於所屬郡國

胡廣曰秋冬歲盡各計縣戶口墾田錢穀入出盜賊多少上其集簿丞尉以下

歲詣郡課校最殿

百官志注又載漢舊儀曰元壽二年以丞

相為大司徒郡國守長吏上計事竟遣公出庭上親問

百姓所疾苦記室掾史一人大音讀敕曰云云 和紀永

元十四年初復郡國上計補郎官注舊制使郡丞奉歲

計 列傳陸康守廬江遣計吏奉貢 度尚為郡上計

吏拜郎中 龐參以被奏稱疾不得會上計掾廣漢段

恭因會上䟽 楊秉桓帝時郡國計吏多留拜為郎秉

上言計吏無復留拜者 皇甫規舉上計掾 公孫瓚

舉上計吏 趙壹光和元年舉郡上計到京師時司徒

袁逢受計計吏數百人皆拜伏庭中莫敢仰視壹獨長

揖逢延置上坐因問西方事 劉翊舉上計掾 建安

中劉劭為計吏詣許 巴郡板楯叛問益州計吏考以

征討方畧漢中上計程包對

云云南蠻

建武十四年叩穀



王長貴

光武紀  
作任貴

遣使上三年計授越雋太守

西南  
夷

三

輔決錄注竇叔高以明經為郡上計吏朝會數百人云

周禮注若今計文書斷於九月

小行人注

今時詔書或曰

齋計吏

掌皮注  
時考使謂之

疏云漢  
計吏

疏漢之朝集使謂之上計吏

上一年計會文書及功狀

小宰  
疏

晉武帝泰始五

年正月癸巳申戒郡國計吏守相令長務盡地利

禁游食商販 王渾傳帝訪王渾元會問郡國計

吏方俗之宜渾曰舊三朝元會計吏詣軒下侍中

讀詔計吏跪受之察其答對以觀計吏人才之實左  
傳戎朝于周發幣于公卿注如今計獻詣公府卿寺疏  
曰晉時諸州年終遣會計之吏獻物於天子北史蘇  
綽傳牧守令長非通六條及計帳者不得居官

漢郡國錢穀簿

後志大司農郡國四時上月旦見錢穀簿陳平傳文  
帝朝而問右丞相勃天下錢穀一歲出入幾何勃謝不  
知左丞相平曰問錢穀責治粟內史黃霸傳領郡錢

穀計簿書正以廉稱 周禮注祿田亦有給公家之賦

貢若今時侯國有司農少府錢穀

司勳注

公侯伯子男必

足其國禮俗祭祀之用乃貢其餘若今度支經用餘為

司農穀矣

大司徒注

桓譚新論漢百姓賦斂一歲為四十

餘萬萬吏俸用其半餘二十萬萬藏於都內為禁錢  
少府所領園地作務八十三萬萬以給宮室供養諸

賞賜

唐計帳 開元戶部帳 三司

六典一歲一造計帳三年一造戶籍縣成于州州成于省戶部總而領焉武德六年三月令每歲一進帳三年

一造籍

後魏蘇綽制計帳戶籍之法  
師古漢書注計若今之諸州計帳

顏地理志開

元二十八年戶部帳凡郡府三百二十八縣千五百七十三戶八百四十一萬二千八百七十一口四千八百一十四萬三千六百九應受田一千四十萬三千八百六十二頃 食貨志初乾元末天下上計百六十九州戶百九十三萬一百二十四不課者百一十七萬四千

五百九十二口千六百九十九萬三百八十六不課者  
千四百六十一萬九千五百八十七減天寶戶五百九  
十八萬二千五百八十四口三千五百九十二萬八千  
七百二十三元和中供歲賦者浙西浙東宣歙淮南江  
西鄂岳福建湖南八道戶百四十四萬比天寶纔四之  
一兵食於官者八十三萬加天寶三之一通以二戶養  
一兵京西北以屯兵廣無上供至長慶戶三百三十  
五萬而兵九十九萬率三戶以奉一兵至武宗即位戶

二百一十一萬四千九百六十會昌末戶增至四百九十五萬五千一百五十一宣宗既復河湟天下兩稅權酒茶鹽錢歲入九百二十二萬緡歲之常費率少三百餘萬有司遠取後年乃濟 舊紀開元十四年五月癸

卯戶部進計帳今年管戶七百六萬九千五百六十五管口四千一百四十一萬九千七百一十二年戶部計戶七百八十六萬一千二百三十六口四千五百四十三萬一千二百六十五天寶元年天下郡府三百

六十二縣一千五百二十八鄉一萬六千八百二十九  
戶部進計帳戶八百五十二萬五千七百六十三口四  
千八百九十萬九千八百 通典按天寶中天下計帳  
戶約有八百九十餘萬計租稅庸調每歲錢粟絹綿布  
約得五千二百二十餘萬端疋屯貫石諸色資課及勾  
剝所獲不在其中其度支歲計粟則二千五百餘萬石  
布絹綿二千七百餘萬錢二百餘萬自開元及天寶開  
拓邊境軍用日增糴米粟三百四十萬匹段給衣則五

百二十萬別支計二百十萬餽軍百九十萬石大凡二千二百六十萬而錫賚不與焉府藏雖豐間閭困矣

列傳張行成代計吏集京師 裴諝拜河東鹽鐵使入

計問權酷利歲出內幾何諝不對 柳冕疏聖唐稽古

天下朝集三考一見皆以十月上計京師十一月禮見

會尚書省

大歷十四年勅諸州刺史入計如式

官志度支掌租賦物產

豐約之宜水陸道涂之利歲計所出支調之

乾元元年十月第五

琦改戶侍帶專判度支自是為故事

藝文志刑法類度支長行旨五卷



開元二十四年三月六日戶部奏州府諸司計  
紙五十餘萬今編成五卷每州不過一兩紙

列傳

崔仁師遷度支郎中口陳移用費數千名詔杜正倫持  
簿使對唱無一謬太宗奇之許孟容貞元十九年旱

言今戶部錢非度支歲計本備緩急取一百萬緡代京  
兆一歲賦則京師無流亡裴度陳調兵食非宰相事

請罷度支歸有司奏可

文宗時

元和十三年十月中書

門下奏三司錢物至年終各具所入所用數分為兩狀

以二月聞奏

唐元和國計簿

藝文志李吉甫元和國計簿十卷元和百司舉要一卷  
會要憲宗元和二年十二月史官吉甫等撰總計天  
下方鎮四十八道管州府二百九十五鎮縣一千四百  
五十三見定戶二百四十四萬二百五十四其鳳翔鄜  
坊邠寧振武涇原銀夏靈鹽河東易定魏博鎮冀范陽  
滄景淮西淄青一十五道七十一州並不申戶口數自  
外每歲賦入倚辦止於浙西東宣歙淮南江西鄂岳福

建湖南八道合四十九州一百四十四萬戶比天寶稅  
戶四分減三天下兵戎仰給縣官八十三萬餘人比天  
寶士馬三分增一大率兩戶資一兵其他水旱所損征  
科妄斂又常在役外以十二月上之凡十卷 舊紀元和二年十

二月己卯史官李吉甫撰元和國計簿成書十卷

舊史又云

李吉甫與史官等錄當時戶賦兵籍凡十卷

百官志比部京師倉庫三月

一比諸司諸使京都四時會于尚書省 中興書目元

和國計畧一卷吉甫以元和間諸道兵將戶口賦入之

數總為書

唐太和國計

志職官類韋處厚太和國計二十卷

以理時制用為國之本撰以獻

唐占額供軍二圖

王彥威傳在開成初

一本云二年

為戶部侍郎判度支嘗見

文宗顯奏曰百口家知有歲計軍用一切可不謹耶臣

自典計司按見管錢糧文簿皆量入為出軍國所用隨

色占費終歲無毫釐差因上占額圖又言至德訖元和

之初天下觀察十節度者二十有九防禦者四經畧者  
三大都通邑皆有兵凡八十餘萬長慶籍戶三百五十  
萬而兵乃九十九萬率三戶資一兵今舉天下之入歲  
三千五百萬上供者三之一又三之二則衣賜仰給焉  
自留州留使外餘四十萬衆皆仰給度支又為供軍圖  
上之彥威雖自謂捷扼姦冒著定其費於利害無益也  
藝文志職官類王彥威占額圖一卷 舊紀開成二

年正月庚寅進供軍圖 食貨志穆宗置南北供軍院

而行營軍十五萬不能亢兩鎮萬餘之衆饋運不能給

帛粟未至諸軍或彊奪於道

長慶二年三月張平叔為  
為戶侍依前判度支時幽

鎮行營仰給度支者十五餘萬人自河北置供  
軍院布帛衣賜不至供軍院遽為諸軍彊奪

王遂

傳遷西北供軍使

一本云元和十三年七月  
王遂為淄青行營供軍使

裴識傳

王師討劉稹為供軍使 咸通八年十月度支奏自南

蠻用兵置供軍使

至道三司著籍

元年五月壬子上召三司孔目官李溥等二十七人問

以計司錢穀之務溥等盡言其利病願得條對許之送  
中書令宰相假以顏色令剖析寇準曰先有司之義也  
已未溥等條上三司利害七十一事中書參校其四十  
四事可行一本云四十二事遂著于籍其十九事令陳恕等議  
定而後行之 金耀門文書庫藏三司帳籍元豐有六  
曹架閣庫紹興三年建庫十五年置官四員嘉定八年  
七月三省亦置

至道版籍式

元年六月己卯詔重造二稅版籍頒其式於天下

咸平占額圖

咸平三年十一月壬午鹽鐵使陳恕上占額圖五年四月詔三司每年比較天下錢穀數於次年條奏

景德會計錄

景德四年七月丙子權三司使丁謂言戶部狀景德三年戶口數

總戶七百四十一萬七千五百七十四

比咸平

六年計增五十五萬三千四百一十戶二百萬二千二



百一十四口賦入之數

總六千三百七十三萬一千二百二十九貫石匹斤

比咸

平六年計增三百四十六萬五千二百九切以版圖之

設生齒必登所以一其租庸辨其衆寡前朝丁黃之數

悉載縑緗國家幅員萬里阜成兆民惟國用之缺書由

有司之曠職臣今以景德三年民賦戶口之籍較咸平

六年具上史館望歲較其數以聞從之

三年十二月三  
司使丁謂始立

比較轉  
運之法

八月丁巳丁謂上景德會計錄詔獎之以其書

付祕閣凡六卷一戶賦二郡縣三課入四歲用五祿食

六雜記衆務之劇莫先會府歲收兩京十七路圖籍四

萬四千百一十七日入事一千五百移文倍之

十二月詔諸道

軍儲之數籍于審院 初咸平五年四月壬午詔三司置籍較天下戶口之數

中興書目共

六門總四十目集戶賦郡縣課入歲用祿食出納之數  
以一歲為準 張方平曰慶歷五年諸路鹽酒商稅歲  
課比景德會計錄增三數倍以上

祥符閱元和國計圖

祥符三年八月甲寅召近臣觀書于龍圖閣閱元和國

計圖三司使丁謂進曰唐朝自江淮歲運米四十萬至長安今江淮歲運米五百餘萬即今府庫充實倉庾盈衍上曰民康俗阜誠賴天地宗廟降祥而國儲有備亦自計臣宣力也 崇文目地里有元和國計圖一卷盛度為鹽鐵判官奉詔編祖宗朝沿革制置勅三卷天下戶口賦稅目別為一卷

祥符會計錄

祥符九年正月辛酉林特上凡三十卷詔獎之仍付秘

閣特前為三司使

特拜三司使真宗賜詩寵之

奉詔纂大中祥符八

年天下戶口財賦凡戶八百四十二萬二千四百三口

一千八百八十萬一千九百三十計入兩稅錢帛糧斛

二千二百七十六萬四千一百三十二綿絲鞋草二千

二百八十三萬六千六百三十六茶鹽酒稅權利錢帛

金銀二千八百萬二千

癸亥發內藏錢五十萬給三司特又為東封西祀朝謁太清宮

慶賜總例

二十六卷

慶歷會計錄

書目二卷慶歷三年三司具在京出納及十九路錢帛  
芻糧之數 景德中鹽課收三百五十五萬緡慶歷五  
年七百十五萬緡景德中商稅收四百五十萬緡慶歷  
五年收一千九百七十五萬景德中酒課收四百二十  
八萬緡慶歷五年收一千七百一十萬 慶歷元年八  
月戊子詔御藥院內東門司取先帝時及天聖初帳籍  
比較近年內中用度增損之數以聞 六年七月甲申  
三司使王拱辰言太祖時兵十二萬太宗時十八萬章

聖時四十萬今遂倍之三司雖總大計而事定在外乙酉乃詔大名并州永興帥臣兼本路計置糧草事

皇祐會計錄

書目田況撰六卷每卷別為題辭 皇祐二年田況為三司使約景德會計錄以今財賦所入多於景德其歲所出又多於所入因撰皇祐會計錄畧依丁謂所述集成六卷一戶賦二課入三經費四儲運五祿賜六雜記其出入之數取一年最中者為準如謂所錄郡縣疆理

復以宮館祠宇附焉此皆不取至於糧芻運餽國之大計特為儲運一篇補其缺上嘉之況為三司使金穀利害纖悉脩舉議者謂三司使自陳恕李士衡之後惟況稱職 崔伯易曰以皇祐之書較景德之錄雖增田三十四萬餘頃反減賦七十一萬餘斛 皇祐二年正月壬子命學士承旨王堯臣都知王守忠右司諫陳升之與三司較天下每歲財賦出入之數以聞四年正月堯臣等較慶厯皇祐總四年天下財賦出

入凡金幣絲纒薪芻之類皆在其數相參耗登皇祐元年入一億二千六百二十五萬一千九百六十四而所出無餘為書七卷丙辰上之詔送三司取一歲中數以為定式二月癸未命中丞王舉正與三司同詳定冗費至和元年八月丙申知諫院范鎮言願詔大臣考求祖宗朝逮天聖中官吏與兵及天下賦入之數而斟酌裁節之嘉祐三年十一月癸酉命學士韓絳等詳定減省冗費十二月乙巳詔三司每歲上天下歲賦之數自今



三歲會其盈虧以聞六年諫官司馬光言民既困而倉廩府庫又虛為今之術在隨材用人而久任之在養其本原而徐取之在減損浮冗而省用之願復置總計使之官使宰相領之凡天下金帛錢穀隸於三司如內藏奉宸庫之類總計使皆統之昔舜舉八愷使主后土奏庶艱食懋遷有無地平天成九功惟叙周禮冢宰以九職九賦九式九貢之法治財用唐制以宰相領鹽鐵度支部國初亦以宰相都提舉三司水陸發運等使則

錢穀皆宰相之職也

李德裕曰人君不以聚貨制用之臣處將相弼諧之任則姦邪無所

容 俞獻卿言危不盈者漏在下木不茂者蠹在內

### 治平會計錄

治平四年九月五日庚辰

神宗已立

三司使韓絳上治平會計

錄六卷詔獎諭內外歲入一億一千餘萬出一億二千餘萬諸路積一億萬而京師不與時兵數少損隸籍者猶百十六萬而宗室吏員視皇祐亡慮增十之三

志蔡襄治平會計錄六卷

治平經費節要

書目八卷治平中編具經常出入之數分三帙上帙戶口賦稅中帙應奉上供下帙諸色經費 寶元二年宋祁言去三冗節三費專備西北之屯

熙寧會計式

見後

熙寧三司會計司

熙寧七年十月庚辰詔三司置會計司以宰臣韓絳提

舉先是絳奏三司總天下財賦其出入之數並無總要  
考校盈虛之法欲選官置司以戶口稅賦場務坑冶河  
渡房園之類租額年課及一路錢穀出入之數歲校增  
虧以能否為黜陟三司使章惇亦言財賦帳籍汗漫無  
以察耗登之數請刪修為策校增虧考能否故有是命  
八年九月庚午罷會計司從絳請也

元豐議經費

元豐三年十一月二十一日壬子曾鞏議經費曰景德

戶七百三十萬墾田一百七十萬頃皇祐戶一千九  
十萬墾田二百二十五萬頃治平戶一千二百七十萬墾  
田四百三十萬頃天下歲入皇祐治平皆一億萬以上  
歲費亦一億萬以上景德官一萬餘員皇祐二萬餘員  
治平并幙職州縣官三千三百餘員總二萬四千員景  
德郊費六百萬皇祐一千二百萬治平一千三百萬以  
二者校之官之衆一倍於景德郊之費亦一倍於景德  
七年十二月十六日詔朝廷封樁錢物令尚書省歲終

具旁通冊進入

元祐會計錄

元祐元年四月十八日左正言朱光庭請置局取戶部  
天下一歲出入與三年郊費四夷歲賜凡百經費會計  
可省者省之量入為出著為令式詔戶部相度二年七  
月戶部言三司即令戶部之職自景德皇祐治平熙寧  
並修會計錄事目類分出納具見宜復講修以備觀覽  
詔可三年閏十二月庚戌戶部尚書韓忠彥侍郎蘇轍

韓宗道等言編成元祐會計錄大抵一歲天下所收錢穀金帛等物未足以支一歲之出欲取費用詳加裁節多不傷財少不害事詔浮費並行裁省忠彥等請仰法寶元慶歷節用裕民自宮禁始前後裁減浮費約及二十餘萬貫 李常傳有元祐會計錄三十卷 蘇轍元祐會計錄叙曰景德皇祐治平熙寧四書網羅一時出內之計首尾八十餘年凡計會之實取元豐之八年其別有五一日收支二曰民賦三曰課入四曰儲運五曰

經費五者既具著之以見在列之以通表若內藏右曹之積天下封樁之實非昔三司所領不入會計將著之

它書

蘇轍熙寧二年三月奏請去三冗

### 宣和兩浙會計總錄

七年八月十七日兩浙運副程昌弼奏漕司以計度經費為職臣分別科目使多寡出入盈虛登耗之數可指諸掌請詔臣編纂宣和兩浙會計總錄頒之郡縣從之靖國元年右司員外郎陳瓘進國用須知言廣恩惠以



收人心有益之事也因邊費而壞成法無益之舉也已  
往之費不可追究未然之費所宜會計 大觀中河北  
漕臣任諒著河北根本錄凡戶口升降官吏增損與一  
歲出納奇贏之數皆披籍可見

紹興會計錄

紹興五年殿中侍御史張絢言周制國用之法在用地  
小大視年之豐耗量入以為出漢祖定天下之本在於  
得秦圖籍周知四方盈虛強弱之實是知國之財用必

得節制之法節財之要必資會計之書所以察其登耗  
量其多寡參酌損益因時制宜故用度有常而民力不  
困也國家景德皇祐皆有會計錄至治平熙寧間亦有  
此書其後蘇轍又倣其法作元祐會計錄雖書未及上  
其大畧亦可觀皆所以總括巨細網羅出納凡天下賦  
入與官吏養兵之數章程各立支費有限謹視其書上  
下遵守此作會計錄之本意也國家比年以來財賦浸  
虛用度滋廣正宜括歲入之厚薄計歲出之多寡分其

品目別其名色摠貫旁通載之圖冊揆考之間如運諸  
掌斯可以裁減浮費增益邦賦今日之先務也伏望明  
詔大臣選委詳練財賦之官俾倣景德皇祐等書撰進  
成錄自紹興元年止四年為率以每歲所入之數列之  
於前却以今歲計之除預借已支費外摠計見今歲入  
實有之數合計若干復以日下至歲終凡官吏之費養  
兵之費及應合用錢物通計若干名曰紹興會計錄量  
入為出既可以見有無之實絕長補短斯可以制裁損

之宜庶幾國用有節云閏二月己酉詔戶部撰集紹興會計錄其後戶部第具去歲收支數以聞而已四月戊申戶部奏出入之數以為皇祐治平會計天下財賦當時取會動經歲月方可成錄故但具去年出入之數

國朝時令季冬之月命有司造計籍注云周禮小宰聽出入以要會鄭司農曰要會謂計日取之簿書日計月要歲計月會故宰夫之職曰歲終則令羣吏正歲會月終則令正月要禮記冢宰制國用必以歲之杪唐六典

度支掌判天下財賦多少數物產豐約之宜水陸道路  
之利每歲計其所出而支其所用淳化中詔三司諸道  
歲計所入悉具數總計司置籍錄之其諸路歲終所收  
財賦置籍出納亦如之景德中令三司每歲較天下稅  
帳耗登以聞紹興戊午之歲光堯嘗以六策詢于宰執  
觀當時大臣所對財用出入之數可見宣和初國家月  
費九十五萬紹興三年月費一百六十萬今以紹興初  
為率通一歲計之國家定費計一千九百二十萬此皆

當時大臣所對財用所出之數也宣和初權貨所入淮南鹽利二千四百五萬兩浙鹽利計七百八萬今淮浙路所入之鹽利通一歲計之共三千二百萬此當時大臣所對財用所入之數也夫以淮浙鹽利一節自足以當國家支費之數此外又有諸路之賦所入不知其幾倍矣三十年十二月二十一日戶侍錢端禮言以紹興二十九年一歲之用編類成冊詔戶部條具均節聞奏

乾道會計錄

乾道元年十一月十七日執政進呈戶部每歲收支總數十八日復呈細數六年五月丁丑詔依皇祐元祐紹興作會計錄從發運史正志之請也七月二十八日詔戶侍王佐造簿籍淳熙六年十二月丁未臣僚請為會計錄上曰向者欲為此錄緣取民太重色目太多若遽蠲則妨經費須他日恢復之後乃可盡除之十三年九月己未詔輔臣以每月財賦冊進呈欲知豐耗淳熙十年八月輔臣奏封樁庫錢及三千萬餘緡及奏內外樁

積緡錢四千七百餘萬十三年庫中所儲金至八十萬兩銀一百八十六萬餘兩下庫見緡常五六百萬先是六年四月左藏封樁庫言緡錢五百三十萬

乾道度支都籍 參考上計錄

乾道四年六月度支郎趙不敵言今一歲內外支用之數大槩五千五百萬緡有奇賦入分隸於戶部之五司支用悉經度支臣置為都籍會計窠名總為揭貼請付本曹自茲歲一易之先是二年正月癸亥十八日知秀州



孫大雅奏書四卷名曰州郡拘催上供錢物格奏入詔  
大雅奏漢上計之法可行於今令侍從臺諫參考古制  
御史張端實劉貢言漢上計之制不能無弊今日能盡  
革其偽乎在東漢則遠方未必皆至今川廣能如期而  
至乎莫若歲終令戶部造冊進呈選一人考覈而明其  
殿最戶侍曾懷請立式行下從之其年三月丁未也

先是

戶部有上中末限之格法有月旬五日之期會歲終以常平收支戶口租稅造冊進呈而州郡案目尚畧

隆興元年三月議節浮費置局於戶部於是省官吏員

減貴戚俸

紹熙會計錄

紹熙元年五月甲戌置紹熙會計錄命戶書葉翥等為之仍自宮掖始以慶厯隆興為法從戶侍趙彥逾之請也二年正月辛未丁丑兩降旨後亦未聞有所減

紹熙三年吏部郎陳傅良奏自建隆至景德四十五年南征北伐未嘗無事而金銀錢帛糧草雜物七千一百四十八萬計在州郡不會祥符元年三月始奏立諸道

上供歲額熙寧新法增額一倍崇寧重修上供格頒之天下率一路之增至十數倍熙寧有令項封樁元豐有無額上供迄今為額宣和經制紹興摠制月椿取之悉而民困極矣

慶元會計錄

慶元二年三月用殿中侍御史姚愈建請命金部郎中趙師炳戶部郎中楊文炳編集以會計司為名三年三月書成六月十九日戶部言以紹熙元年至慶元元年

左藏庫諸倉并總領所出納增損及十二路州軍窠名  
錢參究源流登耗為慶元中外會計錄分五十八冊已  
進呈復條具撙節之數上之宮掖出入之數令內侍自  
稽考九月議者言裁抑當先宮禁詔侍從臺諫兩省集  
議吏書許及之等請內庭裁約中制立為定額從之嘉  
泰元年九月臣僚言戶部歲入約一千八百餘萬支數

僅亦相當

姚愈言熙豐間月支三十六萬宣和末用二百二十萬渡江之初連年用兵月支猶不過

八十萬比年月支百二十萬大畧官俸居十之一吏祿十之二兵廩十之七

端平會計錄

元年 唐制總制邦用度支是司出納貨財太府攸職  
凡是太府出納皆稟度支文符太府依符以奉行度支  
憑按以勘覆互相關鍵用絕姦欺出納之數每旬申聞  
見在之數每月計奏皆經度支勘覆又有御史監臨

陸贄

奏議舊制天下財賦皆入左藏庫而太府四時以數聞尚

書比部覆出納

楊炎傳

國朝三司有帳案內自府庫外

至州縣歲會月計以上三司自治平二年至熙寧二年


十一月凡四年而未鈎考帳已踰十有二萬錢帛芻粟積其虧損不可勝計遂置提舉帳司領之 元豐官制

行釐其事歸比部參掌鈎考中外帳籍之事周官宰夫所謂乘其財用之出入者也轉運司常以計帳申省

三司鈎考無法至道初置行帳司以會財用之數命邊肅主之葉適云王安石大挈利柄封樁之錢所在充滿紹聖元符間拓地進築而斂不及民熙豐舊人矜伐其美然陳瓘譏切曾布以為轉天下之積耗之西邊邦本

自此撥矣於是蔡京變茶鹽法括地寶走商賈所得五  
千萬內窮奢侈外熾兵革宣和之後方臘甫平理傷殘  
之地則士色始立燕雲乍復急新邊之用而免夫又興  
自是以來羽檄交警增取之目大者十數而東南之賦  
遂以八千萬緡為額焉 祖宗時歲百五十萬元豐月  
三十六萬宣和月百二十萬渡江之後月八十萬休兵  
之後循習承平舊典費擬宣和

淳熙未月支  
百二十萬緡



玉海卷一百八十五



欽定四庫全書

子部

玉海卷一百八十六

詳校官中書臣張經田

主事臣祁韻士覆勘

總校官進士臣朱鈐

校對官主事臣陳文樞

騰錄監生臣薛翰

欽定四庫全書

玉海卷一百八十六

宋 王應麟 撰

食貨

理財

虞乘馬筴

管子桓公問曰請問乘馬曰國無儲在令虞國得筴乘馬之數矣公曰何謂管子曰百畝之夫子之筴率二十

七日為子之春事資子之幣春秋子穀大登國穀之重  
去分謂農夫曰幣之在子者以為穀而廩之州里國穀  
之分在上國穀之重再十倍謂遠近之縣里邑皆當奉  
器械備曰國無幣以穀準幣此有虞之筴乘馬也

湯輕重筴 地數

管子桓公問曰地數可得聞乎管子曰地之東西二萬  
八千里南北二萬六千里其出水者八千里受水者八  
千里出銅之山四百六十七出鐵之山三千六百九此

所以分壤樹穀也戈矛之所發刀幣之所起也能者有  
餘拙者不足封泰山禪梁父者七十二家得失之數皆  
在此內是謂國用昔者桀霸有天下而用不足湯有七  
十里之薄而用有餘天非獨為湯雨菽粟而地非獨為  
湯出財物也伊尹善通移輕重開闔決塞通於高下徐  
疾之筴坐起之費時也公曰請問天財所出地利所在  
曰山上有楮者其下有鐵上有鉛者其下有銀一曰上  
有鉛者其下有鈺銀上有丹沙者其下有鈺金上有慈

石者其下有銅金此山之見榮者也

齊管氏輕重 九府書 七筴

漢志管仲相桓公通輕重之權人民有餘則輕之故人  
君斂之以輕民不足則重之故人君散之以重 管子  
輕重篇 地數篇管子曰昔者武王有巨橋之粟貴糴  
之數立重泉之戍令曰民有粟者不行民舉所最粟以  
避重泉之戍而國穀二十倍巨橋粟亦二十倍楚有汝  
漢之金齊有渠展之鹽燕有遼東之煮此三者亦可當

武王之數 揆度篇管子曰燧人以來未有不以輕重  
為天下也堯舜之王北用禺氏之玉南貴江漢之珠今  
諸侯之子將委質者皆以雙虎之皮卿大夫豹飾列大  
夫豹檐大夫散其邑粟財物以市虎豹之皮此堯舜之  
數也桓公問管子曰吾聞海內玉幣有七筴可得而聞  
乎對曰陰山之礪礪燕之紫山白金發朝鮮之文皮汝  
漢水之右衝黃金江陽之珠秦明山之曾青禺氏邊山  
之玉此謂以寡為多以狹為廣天下之數盡於輕重矣

又山至數篇管子曰黃金一筴也江陽之珠一筴也  
秦明山之曾青一筴也此謂以寡為多以狹為廣

輕重乙篇桓公曰吾欲殺商賈之利益農夫之事對曰  
請重粟之價 輕重丁篇桓公曰欲西朝天子而賀獻  
不足為此亦有數乎管子對曰使玉人刻石以為璧管  
子西見天子曰諸侯不以彤弓石璧者不入朝諸侯載  
金玉五穀布帛輸齊以收石璧桓公曰崢丘之戰民多  
稱貸負息以給上之急管子對曰表稱貸之家聖其門  
而高其閭使使者式璧聘之 鹽鐵論文學曰管仲設

九府徼山海 史記管仲傳太史公曰吾讀管氏牧民  
山高乘馬輕重九府注劉向別錄曰九府書民間無有  
索隱曰皆管仲著書篇名九府蓋錢之府藏其書論鑄  
錢之輕重 貨殖傳管子設輕重九府桓公以霸

魏平糴

漢食貨志李悝既為魏文侯作盡地力之教又曰糴甚  
貴傷民甚賤傷農民傷則離散農傷則國貧故甚貴與  
甚賤其傷一也善為國者使民無傷而農益勸今一夫



挾五口治田百畝歲收晦一石半為粟百五十石除什一之稅十五石餘百三十五石食人月一石半五人終歲為粟九十石餘有四十五石三十為錢千三百五十除社間嘗新春秋之祠用錢三百餘千五十衣人率用錢三百五人終歲用千五百不足四百五十不幸疾病死喪之費及上賦斂未與此農所以常困有不勸耕之心而今糴至於甚貴者也是故善平糴者必謹視歲有上中下熟上熟其收自四餘四百石中熟自三餘三

百石下熟自倍餘百石小飢則收百石中飢七十石大飢三十石故大熟則糴三而舍一中熟則糴二下熟則糴一使民適足價平則止小飢則發小熟之所斂中飢則發中熟之所斂大飢發大熟之所斂而糴之故雖遇飢饉水旱糴不貴而民不散取有餘而補不足也行之魏國國以富強

常平乃古法周官司稼以年之上下出斂法出則減價糴斂則增價糴也是非常平乎自鄭氏以出其斂法為

解後人遂攻周禮耳孟子曰狗彘食人食而不知斂塗  
有餓莩而不知發今文作檢漢食貨志作斂是也今世  
言常平出取中丞不知乃古法

漢平準 均輸

史記平準書 食貨志武帝元狩間以東郭咸陽孔僅為  
大司農丞領鹽鐵而桑弘羊貴幸孔僅使天下鑄作器  
三年中至大司農而弘羊為大司農中丞管諸會計事  
稍稍置均輸以通貨物元封元年卜式貶為太子太傅

以弘羊為治粟都尉領大司農盡代僅幹天下鹽鐵弘  
羊以諸官各自市相爭物以故騰踊而天下賦輸或不  
償其僦費乃請置大農部丞數十人置均輸鹽鐵官令  
遠方各以轉販者為賦而相灌輸置平準於京師都受  
天下委輸名工官治車諸器皆仰給大農大農諸官盡  
籠天下之貨物貴則賣之賤則買之如此富商大賈無  
所牟大利則反本而萬物不能騰踊故抑天下之物名  
曰平準天子以為然而許之於是天子北至朔方東封

太山巡海上旁北邊以歸所過賞賜用帛百餘萬疋金錢以鉅萬計取足大農弘羊又請令民得入粟補吏及罪以贖令民入粟甘泉各有差以復終身不復告緡他郡各輸急處而諸農各致粟山東漕益歲六百萬石一歲之中太倉甘泉倉滿邊餘穀諸均輸帛五百萬匹民不益賦而天下用饒 鹽鐵論文學曰今郡國有均輸與民爭利是以百姓就本寡而趨末衆願罷均輸大夫曰往者郡國諸侯各以其物貢輸往來煩雜物多苦惡

故郡置輸官以相給運以便遠方之貢故曰均輸開委  
府于京師以籠貨物是以縣官不失實商賈無所牟利  
故曰平準文學曰古者賦稅於民也農人納其獲女紅  
効其功今釋其所有責其所無百姓賤賣貨物以便上  
求未見輸之均也縣官猥發闔門擅市物騰踊則商賈  
牟利自市牟利自市則吏容姦豪吏富商儲物以待急  
輕賈姦吏收賤以取貴未見準之平也古之均輸所以  
齊勞逸便貢輸非以為利也

嘗觀桓寬之論從大夫之計則曰脩郵塞備屯戍必

蓄貨長財以禦不軌迥有無調緩急必建本抑末以制  
豪人文學之策則曰廣道德開仁義必本脩民慈以興  
教化遏貪鄙醇至誠必  
防塞利門以飭農業

管子通輕重之權曰凡輕

重斂散之以時則準平 地理志千乘郡有均輸官

百官表大司農屬官有均輸平準令丞水衡都尉屬官

有均輸令丞上林均輸四丞 黃霸傳河東均輸長

趙廣漢傳舉茂才為平準令 續志平準令一人六百

石掌知物賈主練染屬大司農均輸等皆省 劉益子

傅光武賜滎陽均輸官地以為列肆使食其稅 朱暉

傳肅宗名拜尚書僕射尚書張林上言宜自交趾益州  
上計吏來市珍怪武帝所謂均輸也詔議之暉曰均輸  
之法與賈販無異非明主所宜行帝卒以林言為然

後紀靈帝熹平四年十月改平準為中準使宦者為令  
列於內舍 六典注和帝改平準為中準以宦者為令  
丞晉少府有平準令丞唐因之 周禮地官質人中士

二人下士四人 主平定物費者 掌成市之貨賄珍異凡賣儻者

質劑稽市之書契同其度量壹其淳制 王莽立五均



官六幹

漢權酤

紀武帝天漢三年二月初權酤 昭帝始元六年二月

議罷權酤七月罷權酤官令民得以律占租賣酒升四

錢 志王莽時羲和魯康令官作酒 賈捐之傳元帝

初上書今天下民賦數百造鹽鐵權酒之利以佐用度

猶不能足 翟方進傳上賜冊曰制詔下君君云賣酒

醪後請止未盡月復奏議令賣酒醪 鹽鐵論大夫以

心計策國用參以酒權

陳天嘉中虞荔奏請權酤隋開皇三年罷唐廣德三年

十二月勅天下州量定酤酒戶隨月納稅

大歷十四年七月辛卯罷

權酤建中三年官自酤

正月辛未復權酤

收利助軍費貞元二年

十二月行權酒法

每斗權一百五十文

元和六年罷京師酤肆太

和八年二月九日罷京師權酤

王仲舒罷江西酤錢九十萬裴諝不對權酒

酒有權非古也妹土之誥萍氏之幾文帝之詔皆害之

懲匪利之奪也

文帝後元年三月詔為酒醪以糜穀者多景中三年夏旱禁酤酒

漢司農少府錢穀

周禮司勲疏先鄭云祿田亦有給公家之賦貢舉漢法  
侯國有司農少府錢穀者漢法穀入司農錢入少府  
鍾離意傳張恢坐臧以資物簿入大司農詔賜降胡子  
縑帝見司農上簿

唐廣關輔糴

食貨志貞觀開元後邊土西舉高昌龜茲焉耆小勃律  
北抵薛延陀故地緣邊數十州戍重兵營田及地租不

足以供軍於是初有和糴牛仙客為相

開元二十五年九月戊子

有

彭果者獻策廣關輔之糴京師糧廩益羨自是玄宗不復幸東都天寶中歲以錢六十萬緡賦諸道和糴斗增

三錢每歲短遞輸京倉者百餘萬斛米賤則少府加估

而糴貴則減價而糴

八年關內河東西隴右和糴一百十三萬九千五百三十石

貞

元初吐蕃劫盟召諸道兵十七萬戍邊關中為吐蕃蹂躪者二十年矣北至河曲入戶無幾諸道戍兵月給粟十七萬斛皆糴於關中宰相陸贄以關中穀賤請和糴

可至百餘萬斛計諸縣船車至太倉穀價四十餘米價七十則一年和糴之數當轉運之二年一斗轉運之資

當和糴之五斗減轉運以實邊存轉運以備時

通鑑貞元八年

九月減江淮運米今京兆邊鎮和糴

要江淮米至河陰者罷八十萬斛河

陰米至太原倉者罷五十萬太原米至渭橋者罷二十

萬以所減米糴江淮水雷州縣斗減時五十以救之京

城東渭橋之糴計增時三十以利農以江淮糴米及減

運直市絹帛送上都帝乃命度支增估糴粟三十三萬

斛然不能盡用贄議

贄奏晁錯論安邊之策要在積穀充國建破羌之說務在屯田

憲

宗初有司以歲豐請畿內和糴

會要證聖元年三月

二十一日勅州縣不得輒取和糴物興元元年閏十月

詔度支於淮浙加價和糴三五十萬石減價出糴貞元

四年八月詔京兆加估和糴先給直所司自運長慶元

年三月戊申以春農方興停京北京西和糴使

先是度支以違

儲無備請置使

實易直表

置和糴貯備使擇郎中為之四年八月詔關內外折糴

和糴一百五十萬石寶曆元年八月詔兩京河西和糴

二百萬斛

趙充國曰金城湟中穀斛八錢吾謂景中丞糴三百萬斛羌人不敢動矣中丞請糴百萬

斛乃得四十萬斛耳

列傳鄭覃擢諫議大夫憲宗取五中官為

和糴使覃奏罷之

杜佑建中初為和糴使

羅珣遷

京兆尹請減平糴半以常賦充之

歸融傳有平糴官

百

官志比部掌會內外賦斂經費俸祿及和糴屯收所

八

平糴之令始於李愷耿壽昌開常平之法至晉齊不能

廢

晉武帝欲立平糴法見常平倉

後魏定和糴之制北齊築富人之倉

隋置監唐置東西市之糴其法一也宋建隆間始因河  
內之稔脩邊糴之事至淳化而天下之糴大備

唐常平法

見常平倉

唐市舶使

傅柳澤開元中

二月十日  
二日

嶺南市舶使周慶立造奇器以

進澤上書曰露臺無費明君不忍象箸非大忠臣憤歎

王方慶廣州都督南海舊有崑崙舶市外區珠琲秋



豪無所索 孔戣拜嶺南節度使蕃舶泊步有下碇稅  
始至有閱貨宴所餉犀琲下及僕隸戣禁止之 盧鈞  
節度嶺南海道商舶始至異時帥府爭先往賤售其珍  
鈞一不取 貞元中嶺南請於安南置市舶中使陸贄  
奏曰王毀櫝中是將誰咎珠飛境外安可復追書曰不  
貴異物則遠人格豈必重中使輕外使

宋朝開寶四年六月壬申廣州兼市舶使

初置

後又置

於杭淳化中徙于明之定海明年復置於杭咸平中杭

明各置司海舶至者視所載十筭其一市其三四元豐  
三年八月二廣閩浙並以漕臣兼提舉元祐二年十月  
六日增置于泉州三年三月置于密州崇寧元年七月  
復置于杭明大觀元年三月癸卯復置提舉官建炎元  
年七月己亥閩浙併于漕臣二年五月丁未復置四年  
二月復置廣司紹興二年七月甲子廢閩司八月併罷  
廣浙提舉官已而閩廣復置乾道二年罷兩浙提舉市  
舶 海舶歲入象犀珠寶香藥之類皇祐中五十三萬

有餘治平中增十萬

中興歲入  
二百萬緡

### 唐和市法

張耀卿傳為長安令舊有配戶和市法人厭苦耀卿責  
豪門坐賈豫給以直絕僦欺之弊 百官志金部掌和  
市之事

宋朝天聖四年二月庚午置西界和市場 和預買起  
於興國七年 景德二年二月諸道歲市紬絹百餘萬  
匹上供減三之一每匹給錢千後以虛券充數以鹽折

支其後以歲額科納建炎三年九月蠲四之一以寬民  
河北權場四陝西二 太平興國七年幽薊還師始  
置權場于靜戎軍李允則典其事慶曆四年十二月辛  
亥置保安靜戎軍權場

唐陸贄均節財賦六條

貞元十年五月贄奏請均節財賦凡六條一論兩稅之  
弊二請兩稅以布帛為額不計錢數三論長吏以增戶  
加稅闢田為課績四論稅限迫促五請以稅茶錢置義

倉以備水旱六諭兼并之家私斂重於公稅

宋朝三司使 淳化總計使 熙寧會計司

會計

式

度支使始於唐乾元元年第五琦鹽鐵使亦始於琦國

初沿後唐制

後唐長興元年張延明請置三司使就命延明班宣徽使之下

併戶部為

三司使凡二十四案吏千餘人

建隆元年八月李崇矩為使

乾德四

年正月定考課之法興國增判官之員

興國元年十二月丁巳始置副

使以賈瑛為之八年三月癸亥分三司各置使

淳化四年五月戊申併為一使

魏羽判三司  
判官六員  
十月庚午置二使分領左右計魏羽閏十

月巳酉置總計使

陳恕為之判左右計事左右計使分判十道事分天下為十道曰河南河

北河東關西劍南淮南江南東西兩浙廣南道東京為左計西京為右計各置判官領之五年七月詔給御前

印紙考課

五年十二月辛丑三司復各置使

罷十道左

張延德張鑑領之兩京十道復歸三部三使各領一司局分相違簿書交錯綱條失序言論盈庭

咸平

六年六月丁亥復合為一使

以命寇準復置副

天聖元年正月

癸未命中丞劉子儀等與三司議裁減冗費寶元二年

五月癸卯詔張若谷等減省冗費慶厯二年四月戊寅

命賈昌朝等省浮費嘉祐三年十一月癸酉置減省司  
學士韓絳及陳升之呂景初等領之五年五月丁酉置  
寬恤民力司六月乙亥遣官往諸路訪寬恤事六年八  
月乙卯命知諫院楊暉詳定寬恤民力事遣使四出自  
是州縣力役多所裁損凡省二萬三千六百二十三人  
先是詔條奏衙前之役為害者治平元年十二月擇三  
司尤繁要者五員用資淺人久任而責效熙寧三年八  
月二十八日命王珪等編脩三司令式

十二月庚辰宰  
臣王安石提舉

七年三月八日三司勅式成四百卷十月十六日巳卯  
詔三司置會計司以宰臣韓絳提舉初絳奏三司總天  
下財賦其出入之數並無總要考校盈虛之法三司使  
亦請刪修為策歲校增虧故有是命八年六月二十三  
日提舉三司會計司上一州一路會計式九月十一日  
丁卯絳奏罷會計司元豐五年改官制四月二十三日  
以三司使安燾為戶部尚書

左右曹其屬有三曰度支  
金部倉部凡官十有三左

曹分案五設吏四十右曹

分案五設吏五十有六



唐劉晏為九使財賦悉歸于一宋朝始分為二而三司使居中發運使居外相為表裏 祖宗外置轉運司以漕一路之賦內置三司使以總天下之財神宗始分天下之財以為二司轉運司獨主民常賦與州縣酒稅之課其餘財利悉收於常平司掌其發斂儲之以待非常之用罷三司而為戶部轉運之財則左曹隸焉常平之財則右曹隸焉 開寶六年八月乙巳令諸州舊屬公使錢物盡數係省毋得妄有支費以留

州錢物盡數係省始於此淳化五年十二月二十一日初置諸州應在司具元管新收已支見在錢物申省熙寧五年十月九日專置司驅磨天下帳籍繼以旁通目子而天下無遺利而公使錢始立定額

宋朝歲賦

國朝混一之初天下歲入緡錢千六百餘萬太宗以為極盛兩倍唐室矣天禧之末所入又增至二千六百五

十餘萬緡嘉祐間又增至三千六百八十餘萬緡其後  
月增歲廣至熙豐間合苗役市易等錢所入乃至六千  
餘萬元祐之初除其苛急歲入尚四千八百餘萬渡江  
之初東南歲入不滿千萬逮淳熙末遂增至六千五百  
三十餘萬今東南歲入之數獨上供錢二百萬緡此祖  
宗正賦也其六百六十餘萬緡號經制蓋呂頤浩在戶  
部時復之七百八十餘萬緡號經總制蓋孟庾秉政時  
創之

陳傅良奏疏云宣和以贍軍糴本與應奉司無名  
之歛合而為經制紹興以稅契之類十餘色合而

為總制

四百餘萬緡號月椿

後又均撥為月椿六軍

蓋朱勝非當國

時取之自經制以下皆增賦也合茶鹽酒筭坑冶權貨

糴本和買之人又四千四百九十餘萬緡宜民力之困

矣政和間陳亨伯為陝西轉運使始議創經制錢大

率添酒價

取量添酒錢

增稅額

增收一分稅錢

官賣契紙

頭子契錢

公家

出納每千收二十三

取之微而積之衆

其後行之東南又行之

京東西河北歲入數百萬緡靖康初廢建炎二年十月

癸亥戶書呂頤浩翰學葉夢得請復之於是先取鈔旁

定帖錢命提刑掌之母得擅用經制錢自此始

建議於陝西後

乃行於東南

總制之法創於紹興五年四月己未叅政孟庾

請頭子錢增十錢癸亥收省戶長雇錢等辛未收入戶

合零就整等錢八月己酉又收常平五文頭子錢並令

諸州通判諸路提刑拘催

一本云紹興五年閏三月二十五日己巳叅政孟庾置總

制司以稅賦合零就整者別置籍拘收無額窠名尤多取最高之數以紹興十九年數為額二十六年七月賀允中請改立經總制歲額從中制十六年用李朝正計專委俸貳歲入至一千七百二十五萬

其後

東南諸路歲收總制錢七百八十餘萬緡而四川不預

大凡東南經總司錢歲收一千四百四十餘萬緡四川  
歲收五百四十餘萬緡江浙月椿錢自紹興二年始  
自願浩勝非並相以軍國不足創取江浙湖南諸路大  
軍月椿錢以上供經制係省封椿等克數崇寧三年  
十一月始立上供錢物新格宣和元年戶部稽攷諸路  
上供錢物之數方今版圖僅及承平之半而賦入過宣  
和之數

天聖節浮費

紀天聖元年正月癸未命官同三司議節浮費丁亥命  
官較茶鹽礬稅歲入登耗以聞二月庚申命張士遜呂  
夷簡魯宗道議茶鹽法三月甲申詔比者營造土木多  
內侍傳宣不關有司工費無節自今先由三司度實用  
然後給之明道二年四月壬子詔內外毋得進獻以祈  
恩澤寶元二年五月癸卯命近臣同三司詳定節省浮  
費六月壬戌詔曰自乘輿服御及宮掖所須宜如前詔  
務從簡約若吏兵祿賜毋得裁減慶歷二年四月戊寅

命御史中丞諫官同三司較景德以來用度罷其不急者五月壬子減皇后及宗室婦郊賜之半乙丑罷左藏庫月進錢三年正月辛巳詔輔臣議蠲減天下差徭賦斂七年三月癸未詔求寬恤民力之事聽官吏驛置以聞上其副于轉運利害明白者轉運顯行之皇祐二年正月壬子命近臣同三司較天下財賦出入之數五年五月戊申詔轉運使毋得掊刻百姓取羨餘以助三司嘉祐三年九月癸酉議罷權茶法十月癸亥除河北鹽



錢十一月癸酉議減冗費十二月乙巳詔三司歲上天  
下稅賦之數三歲一會虧贏以聞四年二月己巳罷權  
茶三月戊戌命近臣同三司減定民間科率五年四月  
丙戌命近臣同三司議均稅六月乙亥遣官分行天下  
訪寬恤民力事 志天聖初命三司及中丞劉均等取  
景德一歲用度較天禧所出省其不急者寶元中賈昌  
朝言省不急用度命密學張若谷諫議任中師司諫韓  
琦議省冗費琦言當自掖庭始取賜予支費之數裁為

中制詔內侍省裁定有司不與西兵久不解財用益屈  
詔內侍以先帝時及天聖初籍較近歲禁中用度增損  
外則命中丞賈昌朝諫官田况張方平同三司議省冗  
費內出詔書減皇后至宗室婦郊祠所賜之半著為式  
公卿近臣以次減時王堯臣為三司使取陝西河北河  
東三路未用兵前及用兵後歲出入財用之數會計以  
聞至和中諫官范鎮上疏今中書主民樞密院主兵三  
司主財各不相知財已匱而樞密院益兵不已民已困

而三司取財不已願使中書樞密通知兵民財利大計與三司量其出入制為國用則民力少寬嘉祐三年樞副張昇請罷民間科率及營造不急之物於是置減省司於三司命學士韓絳陳升之御史呂景初總其事多所裁省景祐元年程琳上疏河北歲費芻糧千二十萬其賦入支十之三陝西歲費千五百萬其賦入支十之五餘悉仰給京師范鎮奏疏備契丹莫若寬河北河東之民備靈夏莫若寬關陝之民備雲南莫若寬兩

川湖嶺之民備天下莫若寬天下之民民力寬則知自愛知自愛雖有外厄人人可用為兵用人人自愛之兵以禦外虞何往而不克 司馬光言為今之術在隨才用人而久任之養其本原而徐取之減損浮冗而省用之

至和便糴

建隆元年正月丁未詔河北歲豐穀賤命使置場增價以糴至道二年八月以歲豐糴於江浙淮三年五月詔

三司市糴咸平六年九月出內府綾錦糴於河北景德

元年九月出內府銀糴於天雄祥符五年五月又出內

帑緡錢命三司博糴

先是三年九月罷江淮和糴九年正月行陝西平糴天禧元年十一

月減河北便糴

天聖元年七月十七日命朝臣往河北沿邊提

舉便糴六年十一月京西穀斗十錢命三司市糴至和

二年薛向言河北糴法之弊歲費錢五百萬得百六十

萬斛才直二百萬緡十一月己未詔向提舉便糴治平

元年八月十六日罷之以屬漕臣

元祐元年五月一日李常請復置紹聖四

年四月罷元豐七年八月十六日給戶部右曹錢六千萬充

陝西邊糴乾道元年正月二十日少農張宗元言輦下  
供餽歲用糧一百五十餘萬石二浙苗米不過八十餘  
萬七十萬皆仰收糴 紹興十八年閏八月甲子命臨  
安平江府淮東西湖北三總領歲糴米百二十萬石有  
奇先是八年四月庚申初置戶部糴場於臨安

建炎提舉戶部財用

建炎元年六月壬午戶書張慤同知密院李綱請以版

曹事委之七月二十五日命愆兼提舉措置戶部財用

十二月

日歷九月丁未

戶書黃潛厚為延康殿學士提舉醴泉

觀同提舉措置紹興五年閏二月丁卯二十日詔足食足

兵今日先務戶書章誼專功措置財用參政孟庾提領

已巳庾乞以總制司為名七月己卯沈與求以參政兼

措置財用

孟庾以提領措置財用為名與求止云兼惟措置

三十二年四月己

巳吳芾言大農之財一歲所入幾五千萬而內藏激賞

不與焉會其多寡比景德全盛時十增其四地不足而

賦加多 建炎三年三月尚書左丞葉夢得除資政殿

學士提舉中太乙宮兼侍讀提舉戶部財用

夢得辭不拜

嘉

熙四年五月與懽以端明殿學士提舉萬壽觀提領戶

部財用

兼侍讀

紹興末始造楮乾道四年造成第一界纔一千萬耳至

七年行第二界即置局收第一界自是率以為常淳熙

六年始疊用第六第七兩界共四千八百餘萬其後又

以第八界收換第六界兩界之數增至六千二百餘萬



自是每界增至四千萬兩界並行止八千萬開禧用十  
一十二兩界調度不給又出十三界併行遂增至十四  
千萬嘉定初出十四十五界共八千萬以收三界以一  
易二嘉熙中四十一千萬有奇 孝宗用錢端禮策用  
會子先積見錢以為之母所出不過二千萬三年一界  
必與換易紹熙間印出寢多其後每當兌界輒復展年  
至開禧累界之數凡一億萬餘過隆興元額幾五倍矣

紹興復常平法

常平之政有提舉官自熙寧始建炎元年六月併歸提  
刑司常平之財所存一二猶以億萬計二年八月癸丑  
朔復諸路常平官十月壬戌詔翰學葉夢得等討論常  
平法條具取旨青苗斂散永不施行又命戶書呂頤浩  
十二月戊午頤浩等言此法不宜廢如免役坊場亦可  
行惟青苗市易當罷三年正月庚寅追還糴本紹興八  
年冬李光言常平法本於耿壽昌豈可以安石而廢九  
年復提舉官使掌其政十五年八月己未復命提舉茶

鹽官兼領常平

先是三年正月己未命憲臣兼提舉常平

乾道制國用使

乾道二年十二月辛卯詔宰相兼制國用使參政同知

國用事

以三省戶房國用司為名

庶幾上下同德永底阜康三年二

月庚申詔國用司具官禁百官三司將校軍人月支數

及泛用造冊以進永為定式五年二月戊申

二十一日罷制

國用司併歸戶房八年正丞相官名四月詔丞相事無

不統其兼制國用與參政更不入銜嘉泰四年十二月

五日詔右丞相兼國用使參政同知國用事侍從卿監  
為參計同參計官參考內外財賦所入經費所出會計  
而總覈之

周以冢宰制國用贊歲成漢以丞相調軍食唐以宰相兼

度支

元和二年八月辛酉宰相武元衡兼判戶部事

開寶五年十一月庚辰

命參政薛居正兼提點三司

呂餘慶

天聖元年詔三路

軍儲出山澤之利移用不足二府大臣其經度之遂置

計置司 司馬光請以宰相領總計之職

慶元後法撮要

淳熙十四年二月十四日中書舍人陳居仁請下勅令所取祖宗免役舊法并紹興十七年後續旨參考刪修為一書名曰後法撮要後勅局中廢事寢慶元二年九月二十一日吏書許及之言勅局修海行法令求以便民者莫切於後法請以新舊法刪潤成一書赴尚書省審訂然後繕寫進呈鏤板頒天下六年四月十五日上之凡一百八十九卷并慶元寬恤詔令四百二十六卷

同進 始繇踐阼萃三百餘事之詔書上踵中興別二  
十五章之役要 紹興十七年十一月丙寅宰臣上紹  
興常平免役勅令格式四百九十九卷詔鏤板頒之

玉海卷一百八十六

欽定四庫全書

玉海卷一百八十七

宋 王應麟 撰

兵捷

檄書 上

檄軍書也晉侯使呂相絕秦檄書始於此漢以後方  
有題

漢大將軍檄三秦



史記

兼荀悅漢紀

高祖元年夏四月漢王欲叛楚蕭何諫曰

收用巴蜀還定三秦

雍章卽塞司馬欣程董翳

天下可圖也乃就國

拜韓信為大將軍信曰三秦王詐其衆降諸侯項王坑

秦降卒二十餘萬人唯邯欣翳三人得脫秦人父兄怨

此三人痛入骨髓大王入關秋豪無所取除秦苛法無

不欲得大王王秦者今舉兵而東三秦可傳檄而定也

漢王於是舉兵出陳倉

荀悅紀五月與韓信俱東

漢丞相諭告巴蜀 漢使諭巴蜀檄

蕭何傳沛公為漢王何諫曰願養民以致賢人收用巴蜀還定三秦天下可圖也王曰善以何為丞相進韓信為大將軍說漢王令引兵東定三秦何以丞相留收巴蜀填撫諭告使給軍食 高紀元年夏四月拜韓信大將軍決策東向遂聽信策部署諸將留蕭何收巴蜀租給軍糧食五月引兵出襲雍定雍地八月塞翟降 司馬相如傳元光五年夏唐蒙使略通夜郎燹中發巴蜀吏卒千人郡又多為發轉漕萬餘人用軍興法誅其渠

率巴蜀民大驚上聞之乃使相如責蒙等因諭告巴蜀民非上意檄曰云云檄到亟下縣道咸諭陛下意毋忽

漢左丞相韓信諭燕檄

韓信傳高祖三年冬十月信既破趙斬成安君問計於

廣武君

李左車

曰今足下虜魏王禽夏說不旬朝破趙二

十萬衆誅成安君名聞海內威震諸侯衆庶莫不輟作  
怠惰靡衣媮食傾耳以待命者當今之計不如按甲休  
兵百里之內牛酒日至北首燕路然後發一乘之使奉

咫尺之書以使燕燕必不敢不聽從燕而東臨齊雖有智者不能為齊計矣

是時燕王臧荼項羽所立

於是用廣武君策發

使燕燕從風而靡

### 漢羽檄

高祖紀十年八月上曰陳豨反吾以羽檄召天下兵未有至者注師古曰檄以木簡為書長尺二寸有急加以鳥羽示速也魏武奏事云今邊有警輒露檄挿羽 淮南王傳持羽檄從東方來 息夫躬曰羽檄重迹而押

至 董仲舒云羽檄不行中國 張儀檄楚 尉陀移

檄告橫浦陽山湟谿關

見史記

漢大將軍穎陰侯諭齊王及諸侯

本傳高后八年八月朱虛侯章告其兄齊王欲令發兵  
西齊王遺諸侯書曰諸呂橋制以令天下宗廟以危寡  
人帥兵入誅不當為王者漢聞之相國呂產等遣大將  
軍灌嬰將兵擊之嬰至滎陽謀曰諸呂舉兵關中欲危  
劉氏而自立今我破齊還報是益呂氏資也乃留兵屯

滎陽使人諭齊王及諸侯與連和以待呂氏之變而共誅之

漢太中大夫諭南越

南粵王傳文帝元年三月告諸侯四夷從代來即位意諭盛德上召陸賈為太中大夫使越賜佗書曰云云使賈馳諭告王朕意佗遂去帝制黃屋左纛

漢中大夫諭南越

武紀建元六年八月閩越王郢攻南越遣王恢出豫章

韓安國出會稽擊之未至越人殺郢降兵還 嚴助傳

漢兵踰領會餘善殺王以降廼令中大夫助諭意風指

於南越曰天下安寧各繼世撫民禁毋敢相并有司疑

其以虎狼之心貪據百越之利或於逆順不奉明詔則

會稽豫章必有長患故遣兩將屯於境上震威武揚聲

鄉屯曾未會天誘其衷閩王隕命輒遣使者罷屯毋後

農時南越王遣太子嬰齊入侍

閩越王數舉兵侵陵百越并兼鄰國陰計奇策

入燔尋陽樓船欲招會稽之地以踐勾踐之迹

西南夷傳建元六年大行王

恢擊東粵東粵殺王郢以報恢因兵威使番陽令唐蒙  
風曉南粵

漢中郎將諭夜郎 牂柯太守諭告夜郎

見兵捷

西南夷傳建元六年唐蒙自南粵還上書曰夜郎精兵  
可得十萬浮船牂柯出不意此制粵一奇也乃拜蒙中  
郎將將千人從巴柞關入見夜郎侯多同諭以威德約  
為置吏使其子為令夜郎旁小邑聽約還報以為犍為

郡



漢中郎將諭烏孫

張騫傳元狩四年天子數問大夏之屬騫曰烏孫王號  
昆莫稍強不肯復事匈奴厚賂烏孫是斷匈奴右臂其  
西大夏之屬皆可招來為外臣拜騫中郎將致賜諭指  
曰烏孫能東居故地則漢遣公主為夫人結為昆弟共  
距匈奴不足破也

漢使諭滇王

西南夷傳莊躋楚威王時畧巴黔中至滇池會秦擊楚

道不通以其衆王滇元鼎六年春滅南粵夜郎入朝誅  
且蘭邛君并殺笮侯冉駹震恐請臣置吏使王然于以  
粵破及誅南夷兵威風諭滇王入朝

漢使者告匈奴單于

詳見紀  
功類

武紀元封元年冬十月詔曰東越東甌咸伏其辜西蠻  
北夷頗未輯睦朕將巡邊垂擇兵振旅躬秉武節置十  
二部將軍親帥師焉行自雲陽北歷上郡西河五原出  
長城北登單于臺至朔方臨北河勒兵十八萬騎旌旗

徑千餘里威震匈奴遣使者告單于曰南越王頭已縣  
於漢北闕矣單于能戰天子自將待邊不能亟來臣服  
何但亡匿幕北寒苦之地為匈奴讐焉

匈奴傳云使那吉風告單于

漢使諭朝鮮

見兵捷

漢使諭宛西諸國

西域傳貳師既斬宛王更立昧蔡為宛王

太初四年春

後歲

餘天漢元年宛貴人殺昧蔡立蟬封為王遣子入侍質於漢

漢因使使賂賜鎮撫之又發使十餘輩抵宛西諸國求  
奇物因風諭以伐宛之威

漢長羅侯常惠青龜茲

西域傳杆彌太子賴丹昭帝以為校尉田輪臺龜茲殺

之

姑翼曰賴丹佩漢印綬  
迫吾國而田必為害

宣帝時長羅侯常惠使烏孫

還便宜發諸國兵合五萬人攻龜茲責以前殺校尉賴

丹王謝曰迺我先王時為姑翼所誤執詣惠斬之常

惠傳本始二年惠使烏孫三年封長羅侯復遣持金幣

賜烏孫惠因請龜茲國嘗殺校尉賴丹未伏誅請便道擊之與吏士五百人俱至烏孫還過發西國兵二萬人令副使發龜茲東國二萬人烏孫兵七千人從三面攻龜茲先遣人責其王以前殺漢使狀

漢使喻告莎車諸國

馮奉世

見兵捷

漢後將軍告諸羌

趙充國傳神爵元年春初罕开豪靡當兒使其弟雕庫

來告金城西部都尉曰先零欲反後數日果反都尉留  
雕庫為質充國遣歸告種豪大兵誅有罪者明白自別  
毋取并滅天子告諸羌人犯法者能相捕斬除罪斬大  
豪有罪者一人賜錢四十萬中豪十五萬下豪二萬又  
以所捕妻子財物盡與之充國欲威信招降罕开乃陳  
兵利害曰騎都尉安國前幸賜書擇羌人可使使罕諭  
告以大軍當至漢不誅罕以解其謀臣遣开豪雕庫宣  
天子至德罕开之屬皆聞知明詔羌前後降者萬七百

餘人及受言去者凡七十輩復奏曰校尉臨衆承威德奉厚幣拊循衆羌諭以明詔

漢長羅侯常惠責烏孫

蕭望之傳神爵二年遣惠使送公主配元貴靡未出塞翁歸靡死其兄子狂王背約自立惠從塞下上書願留少主敦煌郡惠至烏孫責以負約因立元貴靡

漢渤海太守移屬縣

龔遂傳宣帝時渤海歲飢盜起以遂為太守乘傳至界

移書勅屬縣悉罷逐捕盜賊吏諸持鉏鉤田器者皆為  
良民吏毋得問持兵者乃為盜郡中盜皆罷

漢車騎將軍諭呼韓邪單于

匈奴傳竟寧元年單于復入朝上書請罷邊備塞吏卒

郎中侯應以為不可許天子使車騎將軍許嘉口諭單于

曰中國四方皆有關梁障塞非獨以備塞外也亦以防

中國姦邪敬諭單于之意

漢益州刺史諭告廣漢羣盜



孫寶傳鴻嘉中廣漢羣盜起

三年十一月十一日鄭躬反

寶到部親入山

谷諭告羣盜非本造意渠率皆得悔過自出遣歸田里

漢中郎將責匈奴

匈奴傳建平二年烏孫庶子卑援寔翁侯人衆入匈奴  
西界寇盜單于聞之遣左大當戶烏夷泠將五千騎擊  
烏孫殺數百人略千餘人卑援寔恐遣子趨逮為質匈  
奴單于受以狀聞漢遣中郎將丁野林副校尉公乘音  
使匈奴責單于告令還質子單于受詔

漢大司馬移邊郡擊邯鄲檄

光武紀更始至洛陽遣光武以破虜將軍行大司馬事  
十月持節北渡河故趙繆王子林說光武光武不荅林  
於是立王郎為天子都邯鄲降下郡國二年正月光武  
以王郎新盛乃北徇薊二月信都太守任光開門出迎  
世祖因發旁縣得四千人和戎卒正邳彤亦舉郡降劉  
植耿純據縣邑以奉光武於是北降下曲陽樂附者至  
有數萬人復北擊中山拔盧奴所過發奔命兵移檄邊

郡共擊邯鄲郡縣還復響應

更始二年二月

任光傳光多作

檄文曰大司馬劉公將城頭子路子都兵百萬衆從

東方來擊諸反虜吏民得檄傳相告語兵衆大盛 耿

弇傳說光武曰公首事南陽破百萬之軍今定河北

據天府之地以義征伐發號響應天下可傳檄而定

漢大司馬移漁陽檄

通鑑更始二年二月王郎遣將徇漁陽上谷急發其兵

北州疑惑多欲從之耿况

上谷太守

遣寇恂東約彭寵欲各

發突騎二千步兵千人詣大司馬秀安樂令吳漢護軍  
蓋延亦勸寵從秀而官屬皆欲附王郎寵不能奪漢出  
止外亭遇一儒生召而食之生言大司馬劉公所過為  
郡縣所稱邯鄲舉尊號者實非劉氏漢大喜即詐為秀  
書移檄漁陽使生齎以詣寵令具以所聞說之

袁宏紀  
曰漢獨

為檄發  
漁陽兵

漢左大將軍武成侯移鉅鹿檄

任光傳為信都太守更始二年春光武自薊還不知所

向馳赴信都拜光左大將軍封武成侯留南陽宗廣領  
信都太守事使光李忠萬修將兵從邳彤將兵居前光  
乃多作檄文曰大司馬劉公將城頭子路刁子都兵百  
萬衆從東方來擊諸反虜遣騎馳至鉅鹿界中吏民得  
檄傳相告語兵衆大盛

漢河內太守行大將軍事移告屬縣

寇恂傳光武北征燕代朱鮪聞光武北而河內孤度鞏  
河攻溫檄書至恂即勒軍馳出並移告屬縣發兵會於

温下

恂曰温郡之藩蔽失温則郡不可守 更始二年

漢大將軍發幽州十郡兵檄

耿弇傳更始立光武為蕭王令罷兵

二年夏四月 斬王郎

遣苗曾

為幽州牧韋順上谷守蔡充漁陽守北之部時光武居  
邯鄲宮弇說曰公首事南陽破百萬之衆今定河北據  
天府之地以義征伐發號響應天下可傳檄而定秋乃  
拜弇為大將軍與吳漢北發幽州十郡兵弇到上谷斬  
順充漢亦誅苗曾悉發幽州兵引而南

漢瑯邪太守王闕喻吏人檄

張步傳更始遣闕為瑯邪太守步拒之不得進闕為檄  
曉喻吏人降得贛榆等六縣

漢孟津將軍移檄

馮異傳更始遣李軼朱鮪等共守洛陽光武將北徇燕  
趙以魏郡河內城邑全乃拜寇恂河內太守異孟津將  
軍統二郡軍河上拒鮪等異遣李軼書云云度河擊鮪  
鮪走異追至洛陽環城一匝而歸移檄上狀諸將入賀

并勸光武即帝位

漢偏將軍移檄郡國

丁綝傳莽末守潁陽尉世祖畧地潁陽綝說其宰降世祖以為偏將軍從征伐綝將兵先度河移檄郡國攻營畧地下河南陳留潁川二十一縣

漢河西五郡大將軍告武威張掖太守

竇融傳為張掖屬國都尉懷輯羌虜甚得其歡心是時酒泉太守梁統金城太守庫鈞張掖都尉史苞酒泉都



尉竺曾燉煌都尉辛彤並州郡英俊融皆與厚善及更始敗融與統等議曰今天下擾亂未不知所歸河西斗絕在羌胡中不同心勦力不能自守權鈞力齊復無以相率乃推融行河西五郡大將軍事武威太守馬期張掖太守任仲並孤立無黨乃共移書告喻之二人即解印

綬去

通鑑建武元年十二月

漢太中大夫伏隆告郡國檄

伏隆傳建武二年詣懷宮時張步兄弟各擁強兵據有

齊地十一月拜隆為太中大夫持節青徐二州招降郡國隆移檄告曰陛下神武奮發以少制衆故尋邑以百萬之衆潰散於昆陽王郎以全趙之師土崩於邯鄲大彤高胡望旗消靡鐵脛五校莫不摧破梁主劉永造為詐逆今虎牙大將軍屯營十萬拔睢陽劉永奔迸此諸郡所聞也不先自圖後悔何及青徐羣盜得此惶怖獲索賊右師郎等六校即時皆降張步遣使詣闕上書獻鰓魚 光武紀建武二年冬十一月使太中大夫伏隆

招張步降之

漢前將軍高陽侯勞慰幽冀

耿純傳真定王劉楊造讖記與綿曼賊通建武二年春遣騎都尉陳副游擊將軍鄧隆召楊楊閉城門不內乃復遣純持節行赦令於幽冀所過並使勞慰王侯至真定誅楊

漢大司馬廣平侯移平原郡檄

吳漢傳

兼紀

建武四年四月己巳上幸臨平遣漢等擊破

五校於臨平鬲縣

注屬平原

五姓共逐守長據城而反諸將

爭欲攻之漢曰使鬲反者守長罪也敢輕冒進兵者斬  
乃移檄告郡使收守長而使人謝城中五姓大喜相率  
降

漢征南大將軍移檄 喻告蠻夷

光武紀建武五年三月遣征南大將軍岑彭率二將軍  
伐田戎於津鄉大破之十二月交阯牧鄧遜率七郡太  
守遣使奉貢 岑彭傳引兵還屯津鄉當荊州要會喻

告諸蠻夷降者奏封其君長初彭與交趾牧鄧遜厚善  
與遜書陳國家威德又遣偏將軍屈充移檄江南班行  
詔命於是遜與江夏太守侯登武陵守王堂長沙相韓  
福桂陽守張隆零陵守田翕蒼梧守杜穆交趾守錫光  
等相率遣使貢獻悉封為列侯或遣子將兵助彭征伐  
於是江南之珍始通 傅俊傳與岑彭破秦豐因將兵  
徇江東揚州悉定

漢河西大將軍涼州牧諭隗囂

竇融傳建武六年與隗囂書曰西州地執局迫民兵離散易以輔人難以自建計若失路不反問道猶迷不南合子陽則北入文伯耳夫負虛交而易強禦恃遠救而輕近敵未見其利也

漢中郎將喻囂

來歙傳為太中大夫建武三年歙始使隗囂五年奉璽書還復往說之遂遣子入質拜歙中郎將六年三月山東畧定帝欲西收囂兵俱伐蜀復使歙喻旨 王遵傳

為太中大夫建武八年以書喻牛邯曰遵與隗王歃血  
為漢冀聖漢復存當挈河隴歸本朝而王之將吏人人  
抵掌欲為不善之計今吳景驍將雲集四境而以奔離  
之卒拒要阨當軍衝其形執何如哉智者覩危思變賢  
者泥而不滓故夷吾束縛而相齊黥布杖劍而歸漢

漢伏波司馬告武陵蠻夷

宋均傳為謁者會武陵蠻反圍武陵將軍劉尚建武二  
十四年使均乘傳發江夏奔命三千人救之會伏波將

軍援至今均監軍矯制調司馬呂种守沅陵長命种奉  
詔書入虜營告以恩信因勒兵隨其後蠻夷震怖共斬  
其帥降

漢戊巳校尉耿恭移檄烏孫

耿恭傳永平十七年

冬十月

置西域都護戊巳校尉乃以

恭為戊巳校尉屯車師後王部金蒲城謁者關寵為戊  
巳校尉屯前王柳中城恭至部移檄烏孫示漢威德大  
昆彌以下皆歡喜遣使獻名馬及奉宣帝時所賜公主



博具願遣子入侍

時南匈奴已附北單于遁走袁宏漢紀曰永平十七年十月恭移檄烏

孫大  
昆彌

漢中郎將阮种移度遼將軍檄

梁慄傳永初三年冬南單于與烏桓大人俱反詔慄行  
度遼將軍事中郎將龐雄遼東太守耿夔共擊匈奴與  
韃日逐王破之單于乃自將圍中郎將阮种於美稷連  
戰數月攻轉急种移檄求救明年正月慄將八千餘人  
馳往赴之

漢司隸校尉冀并二州刺史檄

安帝紀永初元年十一月戊子敕司隸校尉冀并二州  
刺史民訛言相驚棄捐舊居其各敕所部躬親曉諭若  
欲歸本郡在所為封長檄不欲勿強注長檄猶今長牒  
也欲歸者給以為驗

漢尚書令告江東諸將校部曲檄

尚書令或

漢益州刺史告三郡

邛都夷傳元初五年卷夷大牛種封離等畔明年永昌益州及蜀郡夷應之衆十餘萬破二十餘縣詔刺史張喬討之喬遣從事楊竦將兵至牁榆先以詔書告示三郡密求武士重其募賞乃進軍戰大破之斬三萬餘級

漢遼東太守喻鮮卑 曉慰北匈奴

馮緄傳順帝時鮮卑寇邊以緄為遼東太守曉喻降集虜皆弭散 陳禪傳永寧二年北匈奴入遼東拜禪遼東太守胡憚其威強退還數百里禪不加兵使吏卒往

曉慰之

漢使責南單于

南匈奴傳永和元年夏南匈奴左部吾斯車紐等背畔率三千餘騎寇西河誘右賢王合七八千騎圍美稷度遼將軍馬續與中郎將梁並烏桓校尉王元發緣邊及烏桓鮮卑羌胡合二萬餘擊破之天子遣使責單于開以恩義令相招降單于詣並謝罪

漢中郎將持節監關西兵移營郡

皇甫規傳延熹四年冬三公舉規為中郎將討零吾等破之先零諸種羌降者十餘萬明年東羌降涼州復通規上疏曰四年之秋戎醜蠢戾爰自西州侵及涇陽幸蒙威靈羌戎諸種大小稽首輒移書營郡以訪誅納所省工費一億以上

漢交趾刺史移交趾

賈琮傳中平元年交趾屯兵反執刺史及合浦太守三府舉琮為刺史琮到部訊其狀咸言賦斂重民不聊生

故聚為盜琮移書告使安業招撫荒散蠲復徭役誅渠帥為大害者選良吏試守諸縣百姓以安

漢幽州牧告烏桓

劉虞傳中平四年烏桓峭王等步騎五萬人青冀二州攻破清河平原明年虞到薊罷省屯兵務廣恩信遣使告峭王等以朝恩寬弘開許善路

漢荊州刺史傳檄八郡

劉表傳初平元年為刺史時江南宗賊盛袁術阻兵屯

魯陽蒯越曰威德既行兵集衆附南據江陵北守襄陽

荊州八郡可傳檄而定

長沙零陵桂陽南陽江陵武陵南郡章陵

乃使越遣

人誘宗賊帥斬之襲取其衆江夏賊降江南悉平

漢長沙太守討董卓

通鑑初平元年三月長沙太守孫堅率豫州諸郡兵討董卓袁術表堅領豫州刺史

漢兖州刺史移天下討董卓

臧洪傳靈帝末

通鑑初平元年正月

廣陵太守張超與洪至陳留

見兄邈計事大異之致之於劉兖州公山岱孔豫州公

緒仙乃設壇場盟誓共升壇操槃歃血而盟曰漢室不

幸皇綱失統賊臣董卓乘釁縱害禍加至尊虐流百姓

大懼淪喪社稷翦覆四海兖州刺史岱豫州刺史仙陳

留太守邈東郡太守瑁廣陵太守超等糾合義兵並赴

國難凡我同盟齊心戮力以致臣節隕首喪元必無二

志有渝此盟俾墜其命無克遺育

先是東郡太守橋瑁詐作三公移書州郡

陳卓罪惡  
召兵赴難



漢城門校尉河南尹移州郡討董卓檄

朱雋傳卓入關留雋守雒陽雋與山東諸將通謀為內  
應既而懼為卓所襲奔荊州復引兵還雒乃東屯中牟

移書州郡請師討卓

初平二年

漢太僕移公孫瓚

趙岐傳獻帝西都岐為太僕帝使太傅馬日磾撫慰天  
下以岐為副是時袁紹曹操與公孫瓚爭冀州紹操聞  
岐至皆自將兵數百里奉迎岐深陳天子恩德宜罷兵

安人之道又移書公孫瓚為言利害

一本云初平四年天子使太傅馬日

碑太僕趙岐和鮮闕東岐詣河北任袁紹營移書告瓚

漢侍中守司隸校尉持節督關中諸軍移馬騰

韓遂

魏鍾繇傳關中諸將馬騰韓遂各擁強兵相與爭繇至  
長安移書為陳禍福

漢冀州牧檄州郡

袁紹傳建安五年進軍攻許先宣檄曰云云

漢北海相馳檄州郡

孔融傳時黃巾寇數州北海最為賊衝董卓諷三府同  
舉融為北海相融到郡收合士民起兵講武馳檄飛翰  
引謀州郡

漢丞相露布天下

蜀志建興五年春丞相亮出屯漢中注三月詔曰漢祚  
中微網漏凶慝曹操竊執天衡子丕盜據神器欲奮劍  
長驅指討凶逆朱旗未舉而不復殞喪所謂不然我新

而自焚也諸葛丞相弘毅忠壯亡身憂國授以旄鉞統  
步騎二十萬衆董督元戎龔行天罰克復舊都在此行  
也弃邪從正者國有常典昔輔果絕親於知氏而蒙全  
宗之福微子去殷項伯歸漢皆受茅土之慶此前世明  
驗也若迷沉不反將助亂人不式王命罔有攸赦丞相  
其露布天下

漢呂凱檄雍閩

蜀志雍閩降吳永昌郡五官掾功曹呂凱與府丞王伉

帥厲吏民閉境拒闐闐數移檄稱說凱咎檄曰雍侯造  
怨而封竇融歸志世祖皆流名後葉云云楚國不恭齊  
桓是責夫差僭號晉人不長况臣於非主誰肯歸之

魏涼州刺史西鄉侯張既告諭諸羌檄

張既傳黃初中西平麴光等殺其郡守諸將欲擊之既  
曰今先使羌胡鈔擊重其賞募所虜獲皆畀之外阻其  
執內離其交必不戰而定乃檄告諸羌為光等所誣誤  
者原之能斬賊帥送首者當加封賞於是光部黨斬送

光首餘安堵如故

通鑑載於  
黃初二年

### 魏太尉檄告公孫淵

魏志景初二年正月太尉司馬懿伐遼東六月軍至遼東八月使其相王建柳輔請却兵懿命斬之檄告淵云

### 魏帶方太守告喻倭王檄

魏志正始六年詔賜倭難升米黃幢付郡假授八年太守王頎到官倭女王卑彌呼與狗奴國男王卑彌弓呼素不和遣倭載斯烏越等詣郡說相攻擊狀遣塞曹掾

史張政等因齎詔書黃幢拜假難升米為檄告喻之卑  
彌呼死立宗女壹與政等以檄告喻壹與因詣臺獻白

珠異文雜錦

倭人在帶方東南大海中依山島為國邑漢時有朝見者景初二年朝獻

### 魏鎮西將軍檄蜀

魏志明帝太和二年正月丁未露布天下并班告益州  
曰亮自以為能行兵於井底游步於牛蹄懷李熊愚勇  
之智不思荆邯度德之戒元帝景元四年五月詔征西  
鄧艾鎮西鍾會伐蜀十一月蜀平 鍾會傳景元三年

冬以會為鎮西將軍假節都督關中諸軍事四年秋詔  
鄧艾諸葛緒各統諸軍會移檄蜀將吏士民曰其詳擇  
利害自求多福投迹微子之蹤措身陳平之軌各具宣  
布咸使聞知

魏鎮西軍司宣告諸軍檄

晉衛瓘傳蜀既平鍾會奏鄧艾專擅瓘夜至成都檄艾  
所統諸將稱詔收艾云云俄而會發兵反瓘作檄宣告  
諸軍攻會敗之

咸熙二年



晉雍州刺史劉沉馳檄七郡

劉沉傳

兼紀

太安二年十一月張方逼京師王師屢敗

河間

王頡遣張方將兵七萬出函谷入洛陽

詔沉發兵襲頡沉奉詔馳檄四境

合七郡之衆及守防諸軍塢壁甲士萬餘人襲長安永興元年頡聞沉起兵召張方還

晉都督揚州九郡諸軍事傳檄州郡

通鑑太安二年十二月議郎周玘前南平內史王矩起兵江東以討石冰推前吳興太守顧祕都督揚州傳檄

州郡殺冰所置將吏於是賀循華譚葛洪甘卓皆起兵

應之

石冰寇揚州諸郡盡  
沒遂會稽相張景

晉鎮東大將軍移檄天下征鎮州郡縣國

齊王景傳元康中趙王倫密與相結倫篡遂與豫州刺  
史何勉龍驤將軍董艾等起軍遣使告成都河間常山  
新野四王移檄天下揚州刺史郗隆承檄猶豫未決參

軍王邃斬之

永寧元  
年三月

晉左衛將軍馳檄四方

傳成都王穎有無君之心永興初元左衛將軍陳眕殿

中中郎逢苞成輔及長沙故將上官巳等奉大駕討穎

馳檄四方赴者雲集

晉司空移檄天下 晉鎮東大將軍檄四方討

石勒 晉丞相大都督中外諸軍事移檄 晉

王傳天下檄

元帝紀懷帝蒙塵永嘉五年六月司空荀藩等移檄天

下荀組為司隸校尉推帝為盟主愍帝即位進丞相大

與藩移檄天下

都督中外諸軍事建興四年十二月西都不守帝出師  
露次移檄四方召天下之兵尅日進討建武元年三月  
辛卯即晉王位改元六月己巳帝傳檄天下曰逆賊石  
勒肆虐河朔石虎敢帥犬羊渡河縱毒今遣車騎將軍  
琅邪王裒等九軍銳卒三萬水陸四道徑造賊場受祖  
逖節度 懷帝紀永嘉六年二月癸丑鎮東大將軍琅  
邪王睿上尚書檄四方討石勒 虞潭傳領南康太守  
被元帝檄使討江州刺史華軼

時荀藩移檄以琅邪王  
為盟主軼不從命故討

之

晉安豐太守檄周馥

傳淮南太守裴頌為周馥所敗退保東城求救于元帝

琅邪王

帝遣揚威將軍甘卓建威將軍郭逸攻馥于壽春

安豐太守孫惠帥眾應之使謝摛為檄

永嘉五年 馥都督揚州永嘉

四年上書迎天子遷都壽春頌奉東海王越密旨圖馥遂襲之

晉平北將軍移州郡檄

通鑑永嘉六年七月劉琨移檄州郡期以十月會平陽

擊漢

晉征東大將軍都督青州諸軍事青州刺史檄

六州

荀晞傳移告諸州陳東海王越罪狀時懷帝惡越專權  
乃詔晞曰王彌石勒為社稷憂故復遣詔檄六州協同  
大舉翦除國難晞復檄諸征鎮州郡

晉大將軍都督并州諸軍事移檄州郡

通鑑建興二年二月石勒送質子劉琨請討王浚以自

効琨大喜移檄州郡稱已與猗盧方議討勒勒走伏無  
地求拔幽都以贖罪今便當遣六修南襲平陽除僭偽  
之逆類降知死之逋羯

考異琨集檄首云三  
月庚午朔五日甲戌

晉鎮西將軍都督隴右諸軍事馳檄關中

張軌傳聞秦王

愍帝

入關乃馳檄關中遣步騎翼衛乘輿

晉都督并冀幽三州諸軍事檄告華夷

通鑑建武元年三月劉琨段匹碑同盟期以翼戴晉室  
辛丑琨檄告華夷琨遣兼左長史右司馬溫嶠匹碑遣

左長史榮邵奉表及盟文詣建康勸進 劉琨傳元帝

稱制江左琨令長史溫嶠勸進於是河朔征鎮夷夏一  
百八十人連名上表建武元年琨與匹磾期討石勒匹  
磾推琨為大都督歃血載書檄諸方守俱集襄國琨匹  
磾進屯固安以俟衆軍 溫嶠傳琨遷司空以為右司  
馬元帝初鎮江左以為左長史檄告華夷奉表勸進

晉湘州刺史馳檄遠近

忠義傳易雄為春陵令湘州刺史譙王承距王敦謀起



兵以赴朝廷雄承符馳檄遠近列敦罪惡

永昌元年正月承起兵長

沙

虞悝對承曰宜收衆固守傳檄四方其孰必分然

後圖之事可捷也

樂道融說梁州刺史甘卓襲武昌

卓乃與巴東監軍柳純等露檄率所統致討

### 晉郝鑒檄青州

藝文類聚庾闡為郝鑒檄青州文云云郝鑒為龍驤將軍兖州刺史鎮鄒山三年間衆至數萬加輔國將軍都督兖州諸軍事

晉廣州刺史平越中郎將諭溫邵

陶侃傳杜弘據臨賀與溫邵及劉沉俱謀反侃直至廣州擊弘破之執劉沉於小桂討王機斬之諸將請乘勝擊溫邵侃曰吾威名已著一函紙自足耳於是下書諭之邵懼而走追獲於始興

晉江州刺史持節都督平南將軍告四方征鎮  
檄

溫嶠傳咸和初鎮武昌未幾蘇峻反嶠屯尋陽遣督護

王愆期西陽太守鄧嶽鄱陽內史紀瞻等率舟師赴難  
及京師傾覆嶠奉陶侃為盟主於是列上尚書陳峻罪  
狀有衆七千灑泣登舟移告四方征鎮曰咸和三賊臣

年四月

祖約蘇峻同惡相濟宜增軍討撲今躬率所統為士卒

先西陽太守鄧嶽尋陽太守褚誕等連旗相繼宣城內

史桓彛屯濱江之要江夏相周撫軍已向路昔包胥重

趼致誠藺相如案劍秦庭臧洪登壇歃血况今居台鼎

據方州者哉有能斬約峻者封五等侯賞布萬匹

嶠與侃書

曰近已移檄遠近言於盟府越後月半大舉南康建  
安晉安三郡軍同赴此會 侃嶠同赴京師戎卒六萬

郗鑒傳領徐兗州刺史設壇場大誓三軍曰約峻不恭  
天命不畏王誅凶戾肆逆干國之紀侮弄神器拔本塞  
原昔戎狄泯周齊桓糾盟董卓陵漢羣后致討義存君  
親古今一也若二寇不梟義無偷安 顧眾傳峻反潛

圖義舉吳國內史蔡謨檄為本國督護賊率張健等據  
吳城會稽內史王舒吳興內史虞潭並檄眾為五郡大  
都護統諸義軍

晉撫軍將軍會稽內史假節都督行揚州刺史

事移告屬郡

王舒傳蘇峻作逆吳國內史庾冰棄郡奔舒舒移告屬郡以吳王師虞駿為軍司御史中丞謝藻行龍驤將軍監前鋒征討軍事率衆一萬與冰俱渡浙江前義興太守顧衆護軍參軍顧颺等皆起義軍應舒

晉荊州刺史都亭侯庾翼檄石虎

藝文類聚檄文曰石勒翦覆舊京窮凶極逆百姓受仄

沒之酷王室有忝離之哀石虎負恃其衆陸梁河朔今遣使持節荊州刺史都亭侯翼高旗連雲組練映日運孫吳之籌按尚父之畧莫不張膽咀鐵人思自伯以此衆戰猶烈火之燔秋蓬衝颺之掃落葉也

晉彭城內史劉裕移檄都下

南史元興三年二月己卯裕與何無忌等集義徒凡二十七人推裕為盟主軍次竹里移檄都下曰逆臣桓玄阻兵荆郢肆暴都邑雖夏后之離泥塗有漢之遭莽卓

未足為喻云云裕等乘機奮發義不圖全輔國將軍劉  
毅廣武將軍何無忌鎮北主簿孟昶兖州主簿魏詠之  
寧遠將軍劉道規龍驤將軍劉藩振威將軍檀憑之等  
忠烈斷金精貫白日義衆既集文武爭先公侯諸君或  
世立忠貞或身荷爵寵顧瞻周道寧不弔乎上憑祖宗  
之靈下罄義夫之節翦馘逋逆蕩清京華益州刺史毛  
璩掃定荆楚江州刺史郭昶之奉迎主上宮於尋陽鎮  
北將軍王元德等保據石頭揚武將軍諸葛長人已據

歷陽征虜將軍庾曠之等結為內應同力協契所在逢

起即日斬徐州刺史脩青州刺史弘

益州刺史毛璩執  
玄使不受其命傳

檄速近列

玄罪狀

### 宋太尉檄蜀

宋袁豹傳袁豹為宋高祖太尉長史高祖遣益州刺史

朱齡石伐蜀豹為檄文曰失仁與義難與求安憑阻負

釁鮮克有成故成都丕祀華陽無興國菴爾譙縱同

惡相求反噬州相毒害民黎俾我西服隔閩皇澤今北



狄露晞南寇埃掃朝風載戣庶績其凝清江原於濫觴  
澄氛侵於井絡誅叛柔遠今也其時組甲貝冑景煥波  
燭今三峽之隘在我境內非有岑彭荆門之險深入其  
阻平衢四達實無鄧艾綿竹之艱山川之形抑非曩日  
攻守難易居然百倍當全蜀之強士民之富子陽不能  
自安於庸樊劉禪不敢竄命於南中荆邯折謀伯約挫  
銳故知成敗有數非可智延此皆益土前事當今元龜  
也盛如廬循強如容超凌威南海跨制北岱樓船萬艘

掩江蓋汎鐵馬千羣克原塞隰然廣固之攻陸無完雉  
右里之戰水靡全舟或顯戮京畿或傳首萬里故知逆  
順有執難以力抗斯又目前殷鑒深切著明者也豈不  
遡誠南凱延首東雲普天有來蘇之幸而一方懷後予  
之怨王者之師以仁為本捨逆取順爰自三驅齊斧所  
加縱身而已其有矜甲反接自投軍門者一無所問如  
其迷復姦邪守愚不改火燎孟諸芝艾同爛河決金隄  
淵丘同體雖欲悔之亦將何及

紀在義熙八年十一月  
伐蜀九年七月平蜀

宋後將軍長沙王告司寇二州

宋書索虜傳元嘉七年三月詔曰河南湮沒可簡甲卒  
五萬給右將軍到彥之統安北將軍王仲德兗州刺史  
竺靈秀舟師入河驍騎將軍段宏精騎八千直指虎牢  
豫州刺史劉德武勁勇一萬以相掎角後將軍長沙王  
義欣權假節率見力三萬監征討諸軍事先遣殿中將  
軍田竒告燾河南舊是宋土今當修復義欣出鎮彭城  
總統羣帥告司寇二州曰云云高祖內夷篡逆外平寇

亂響軼龍堆聲浮雲朔陵天振地拔山蕩海於是華域  
肅清流澤洋溢中葉委政冢宰強敵乘釁司克良民重  
隔王化提吳楚之勁卒總八州之銳士紅旗絳天素甲  
奪日虎步中原龍超河渚夫順從貴速歸德惡晚賞褒  
先附威加後服若能審決安危歸投軍門者當表言天  
臺隨才叙用如其迷心不悛竄首巢穴長圍既周臨衝  
四至雖欲壺漿厥篚其可得乎幸加三思詳擇利害

梁移魏文北伐檄

南史普通七年大舉北侵勅裴子野為移魏文又為書  
喻魏相元義 類聚載喻虜檄曰昔由余入秦禮以卿  
佐日磾降漢華貂七葉 周興嗣為北伐檄

梁湘東王移檄遠近討侯景

梁書太清四年四月丙午湘東王繹下令大舉討侯景  
移檄遠近

魏侍中驃騎大將軍關西行臺傅檄方鎮

後周書時魏帝方圖高歡秦傅檄方鎮曰詔書稱歡逆

亂分命將帥襲其窟穴電繞蛇擊霧合星羅躬自東轅  
電赴伊洛輾裂賊臣以謝天下

東魏西兗州刺史檄東方諸州

北齊書武定五年正月辛亥侯景據河南叛歸于魏遣  
軍士二百人暮入西兗州欲襲取之刺史邢子才覺之  
掩捕盡獲之因散檄東方諸州各為之備

東魏軍司杜弼檄梁

梁書梁太清元年

東魏武定五年

十二月甲子朔東魏使杜弼

作檄移梁朝曰吳侵齊境遂為句踐之師趙納韓地終有長平之役侯景周章向背夫豈徒然拒此則氣不足攻彼則勢有餘呼之則反速而釁小不召則叛遲而禍大會應遙望廷尉不肯為臣自據淮南亦欲稱帝但恐楚國亡猿禍延林木城門失火殃及池魚外傾中潰今實其時鷓蚌相持我乘其敝

後周大司馬檄吐渾

周書武成初吐谷渾侵涼州詔大司馬賀蘭祥與宇文

貴討之祥遣其軍司檄吐渾曰云云

隋大將軍府傳諸郡檄

唐高祖紀大業十三年

即義寧元年

六月己卯傳檄諸郡稱

義兵開大將軍府

癸巳

張道源傳授大將軍府戶曹參

軍京師平

十二月癸未

遣撫慰山東燕趙諭羅藝降

武德二年十月

已亥藝以地歸

通鑑元年

魏徵傳自請安輯山東擢秘書丞馳

駟至黎陽

武德元年十一月

通鑑義寧元年六月己卯裴寂

等請尊天子為太上皇立代王為帝以安隋室移檄郡



縣七月癸丑帥甲士三萬發晉陽立軍門誓衆并移檄  
郡縣諭以尊立代王之意西突厥阿史那大奈帥衆以  
從八月癸巳至龍門薛大鼎請直濟河據永豐倉傳檄  
遠近關中可坐取也武德元年正月丁未朔唐王以書  
諭諸郡縣東自商洛南盡巴蜀郡縣長吏及盜賊渠帥  
氏羌酋長爭遣子弟入見請降

玉海卷一百八十七